

HEBREWS

God-hu uavamu hesi Harihehu jö majahuijade jöhoje.

¹ Urimoho God-ro mue gö gö majae göro göro vaebe rueromo ehuro hesi jöho röjèhi'ego jö hesire baeromo majèhinövare ariböviohuro baeromo nosi hijo miono'oho majèhinövareje.

² Èhi'obe rovadoho avevejö'e ijo tugoho'i jioröhe majaho dunovamu God-ro uavamu hesi Harihohuro jöho majahuijè'eje. ÈHarihoho God-ro uavè'èro sa'ae bövie bise'e bamadoho èho ijonö hesi bae barè'iröhohoje.

³ Iae hu God-are aji maho baeromo ehuro no ajivavuajeje. God jiajèhi hu èhije. Hesi darugo'e jöho jövoromo ehuro sa'aho bövioho bise'oho aho'o ma'eno titimajeje. Huro nosi sisèho u'ovahuonugoromo dö mare ajiomoromo God börömo jiaje a hesi övo manö hijadeje.

⁴ Èhu'èro jiè'èro anerae aho'obèhe iosirèmiromo huro dö mare hijajeje. Göho hu God-are Harihèro jiè'èro hu iho bövi maho baejamu hesi ihohuro anera jabesiroho iosirèmijè'eje.

God-are Harihehu anera ömo'ömo iosirèmijaje jöhoje.

⁵ God-are Harihehu anera jabesi iho iosirèmiromo iho börömo baejade jöho God-are surire jajivadoho gavarueje. God-ro anerae bogo gemu vadu'oho ave jöho ua'i ma-hesi Harihoho gemu uavadeje:

Ja nasi Harihoho javajëjo.

Jaruvoho naro ja baejavë'e jevajëjo.

O God anerae bogo gemu vadu'o hesi jöho jövoromo ae uë'i ma-hesi Harihu hesi jöhemu uëvadeje:

Na hesi Vavuoho jevo'i

hu nasi Harihoho jio'a'ajëjo.

⁶ Jö göho God-hu hesi Harihu Muri sa'are nugö'öjadevare evare uvadeje:

Na negajëjo God nasi aneraho aho'obëhe jaburo ë aho gemu rajahiruomoröhego.

⁷ O anera bogo iho masijo jio'amaje jöho huro uvë'eje:

God naro nasi aneraho avohëvego bururae'amaje höjo.

Nasi mu ajemjarue aru'ahoho avohëvego vëni hödurae'amaje höjo.

⁸ Anera jabesi jöho ëhi uvo'i Harihu hesi jöho ëhi uvë'eje:

God ja böröme namijanuoho ëhi namiemu namibe va'a'anuëjo.

Böröme namiromo jero jasi öri ari'oho avoho muebejanue höjo.

⁹ Ja mu maho nimo'i mu sisëho bijönimanue höjo.

Ëhuni God jasi A Börömoho naro ja baejavoromo huë mabëhe bojamijamu

jero jasi aribövioho iosirëmijë'ëro ja börömoho javajëjo.

¹⁰ Röhu God-are Harihu hesi örire jö göho ëhi uvë'eje:

Bada ni'i'ivadiroho jero sa'aho bamane höjo.

Ö'idöhu'o jasi övëro avohane höjo.

11 Sa'ahu'o ö'idöhu'o barëli a'i jero biririvoromo hiemu hi'a'anuëjo.

Sa'ahu'o ö'idöhu'o niögëro buraerovanovo'ajëjo.

12 Aehu niögu suhi'o muotoho bahijaruëhi ëhi ö'idöho sa'aho rori'o bahi'anuëjo.

Aehu niögu jijö boremi'ö'i i'o io'amaruëhi ö'idö mamioho sa'a mamioho ëhi mu'u'i i'le avoho'anuëjo.

A'i ja vadune manaere aho'o ëhi ma-jiemu jiobe va'a'anuëjo.

13 God-ro anerae bogo gemu vadu'o ho ua'i mahesi Harihohemu uavadeje:

Nasi övo manö ro hijego

ja'o muorovarue aribövioho naro ruahö'öjëvego hörëro vijuvo taemo'amo'irane höjo.

14 Harihoho ëhi böröme jio'i a'i anerae aho'o jabumë ma-God-are mu vaejहारue aru'ahe jio'ame. Ëhi jio'amë'ëro God-ro rëmö'öjego jaburo rueromo God-hu ijonö mare ramuo'iröhe aribövioho no ajamuijarueje. Ëhu'ëro jië'ëro God-are Harihohuro aneraho iosirëmiromo hu börömo mahoje.

2

God-hu baejavuoromo mare ramuaje jö noehu avoho uehorovo'iröhe jöhoje.

¹ God-are Harihohuro aneraho iosirëmiromo hu böröme jië'ëgo ehuni noehu God-are jö hejaro ho bogo rumonimo'i biririvoromo ma'eno'ejo jöho nugo'i öre gö va'ojöëni.

² Urimoho aneraëro Jew rajo hijo miono'oho God-are jöho bojëmareje. Ëaneraho bogo masijehu jëvadeje röhu jabesi jöho bogo sareri'ehu jio'i iae mae jiadeje. Iae mae jië'l'ëro ae rahu jö bogo ejëho'i mu gö gö vaejë'oho i'ue mana baenövareje.

³ A'i jaruvoho God-hu nosi aru'aho mare ramuaje jö bojamuijadoho ëho jö börömeje. Ae rahu ë jö vuonugë'oho i'ue baejööni gororomo huruomoromo dinö'e va'ejo. Huruomo'iröhe öroho bogoje. Ehesi bëhoho bogo aneraho uö'i Badaro aevoromo hesi jö'l'ëro majahuijamu jö hejare aribövioho jaburo ë jöe gemuoho majahuiromo uövuareje: Iae mae-ëjo.

⁴ Röhu bogo jabesi sivuoho ëma majahui'i a'i God-ro jabesi jöho ajëmiromo bogo gavarue darugo'e mue gö gö vaenövadeje noro garomo jöho mae uehorovoröhego. Darugo'e muoho vaeromo huhu nimadëhi hesi Aru'ahoho ua'ego noehu mu mae vaeröhe suvuore gö gö ëhi bojamuinövadeje noro ëhu'o garomo jöho mae uehorovoröhego.

Iesu hu baejavuoromo manö ramuade a böröme jiaje jöhoje.

⁵ Röhu ëhi jië'e mu masijoho ëho u'emu jioröhe öri ari'o i'o hesi muohoje. Na ë hesi jöho jajive. God-ro ë öri ari'o i'o bamo'i uehorovadevaroho bogo uvadeje: Aneraëro masije riravoromo ë öri ari'oho mueberuomo'ajëjo.

⁶ Bogo aneraho jaburo mueberöhego uvo'i a'i jöe gö God-are surire uvë'eje: God-ajo. Sa'are aribövioho ma-bise'e javuajëjo.

Röhu jero nosi jöeni uehorovanue hōjo.

Nosi ihoho bogojavuanovajējo.

Röhu jero no muebejavuanue hōjo.

⁷ Anera masijo jio'amaje jabesi bēhire sa'are aribövioho no bamavuane hōjo.

Ajohu'o iho mabēhohu'o bojamuane hōjo.

⁸ Noro hörero taemoromo muebe'amorōhego bövie bise'e nosi hörü uhunö bahijahuane hōjo.

Ēhi jajivē'eje. Bövi bise'o nosi hörü uhunö bahijade jö hesi bēhoho aho noro aho'obēhe ruahö'ō'amoromo muebe barē hesi javue. Röhu avevejö'oho bövioho bise'oho nosi hörü uhuroho bogojavuē'ero ēhu'ero aho no bogo aho'obēhe taemoromo muebe'amarueje. Ēhi jiē'e muoho nosi nunoho bogo gavarueje u'emu garöhëro.

⁹ A'i noro ae gemu Iesu iae gavö. Iesu hu döre jiadoho God-ro hesi nimoro huë baejavuoromo hu uavamu ruvebiromomo anera jabesi bēhire hijadeje ae aho'obēhe noni guomorōhego. Hiromomo vavaene baeromomo guomamu ēhuni God-ro hu dōro bamoromomo ajohu'o iho mabēhohu'o bojamamu baejadeje. Ēho iae no gavö.

¹⁰ God-ro aboji harihu'e aho'obēhe aji'ere sōjavuo ujuoho va'i nimamu ēhuni baejavuoromomo mare ramuo'irōhe a börömoho Iesu uavadeje huro vi'ehe baejōro ēhuro mue aho'obēhe ruahō'amoromomo eni romoromemu jiego no baejavuoromomo maro ramuo'irōhego. God-hu bövi bise'o avohoromomo muebe'amajohuni ēhuni huhu Iesu ēhi uavadoho mae jiadeje.

¹¹ Röhu nosi sisë u'ovahuaje aho Iesuoje. Sisë javuego u'ovahuaje aribövioho iae no javue. Röhu hesi Vavuohu'o nosi Vavuohu'o gemuohoje. Vavue gemuoho javuë'ëro Iesuro bogo javojimo'i ma-uvajeje: No ö mueno'e gemuoho javuajëjo.

¹² Iesuhu uvaje no ö mueno'e gemuoho javuajë uvaje jöho God-are surire jajivoromo ëhi uvë'eje: God jasi jöho naro majëhi'iramu nasi ö mueno'ohuro heruomo'ajëjo.

Naro jasi ariböviohu'o gemuore hiromo jasi örire rajahiromo jöho io'ejöjo.

¹³ Röhu Iesu ae aho'o no'o gemuore jiaje jöho gö'o jajivoromo uvë'eje: Naro uvonövo'ejöjo: Hesi God-ro gemuëro ajemi'ajëjo. Röhu jöe gö'o uvë'eje: Na aviae jevajëjo. Na God-hu bojemade aboji harihu'ohu'o gemu mae hijajëjo. Iesu'o no'o gemu mae javuaje jöho ëhi jajivë'eje.

¹⁴ God-are aboji harihu'e javuajë uvadeje. Röhu aboji harihu'oho no sino haho'e biroge köe javuë'ëro ëhuni Kerisoro araeromo hu'o sino haho'e biroge köe ëhi gemuoho baejadeje ëhuro guomoröhëro. Guomego vuovo'iröhe öri hesi vörö baejaje aho Satan hesi darugoho mu'uvaho barë'iröhego.

¹⁵ Satan-are darugoho mu'uvahego no vuo-vavuoröhe ë hesi juhuonoho barëjahuo'iröhego. Ehesi bëhoho urimë'i vuovavuo'iröhoho uehorovoromo juhuonivobe rovereje. Juhuoni juhuoni raromarohe diehi'oromo vuonugojöëni ëhuni sisë'i raromareje. Ehi jië'e juhuonoho barëjahuo'iröhego ëhuni guomadeje.

¹⁶ Aveho iae mae. Iesuro bogo aneraho ajëmi'i a'i Abraham-are ujoho no ajamuijajeje.

¹⁷ Èhu'ëro jië'ëro huro araeromo hesi ijoraje nomë va'ëne jiadeje. Èöre gemu jiadeje èhuro hu God-are muoho vaeromo priest böröme mabëhe jioröhëro. Èhi jië'e priest jioromo noni vavaenimoromo muoho avoho vaeromo a nosi sisëho u'ovahuoröhëro. Èhuni no va'ëne jiadeje.

¹⁸ Sisëhuro Iesuale dëre bijiohamu vavaene baej'ëro èhu'ëro huro garöhe sisëhu nosi dëre bijioho gövuego huhu ajamui'iröhoho iae hu eni jie.

3

Iesuhu Moses iosiramiromo böröme jiaje jöhoje.

¹ Christian aganomë God-ro uëvadeje jemë'o hesinö jëvojöro. Èhuni Iesu uehorovo avohore. Iesuro God-are ihore jöe majahuijajeje. Hu nosi priest börömohoje. Èhu'ëro noro hu mae uehorovoromo hesi jöho huruoho majëhijarueje.

² Huro God-are örire muoho baeromo ë muoho avoho vaenövadeje. Urimë'i Moses-hu God-are mu avoho vaejahoromo God-are aribövie aho'o muebejëvonövadëhi Iesuro èhi gemuoho ë'adeje.

³ Röhu Iesuro Moşes iosiramiromo iho börömoho baej'ëje. Èhesi bëhoho Moses hu ma-God-are agane gemuoho jio'i Iesu hu God-are agano gagovade aeje. Èaganoho gagovë'ëro èhu'ëro Iesuale ihohuro Moses-are ihoho iosiramijë'eje.

⁴ Agane gö gö bogo ëma jio'li aëro gagovoromo gemuoro nugo'amë'eje. Agano gagovoromo bövi bise'o avoho'amade aho God-je.

⁵ Moses God-are mue vaejahaje aëro jië'ëro God-are agano ioro'iorohu'o hiromo hesi muoho avoho vaenövadeje. God-are muoho avoho vaeromo God-hu ijonö majahui'iröhe jö jiajèhi jië'e jöho huro urimo ae majëhinövadeje.

⁶ A'i Keriso bogo ma-mu vaejahaje aehu jio'li hu God-are Harihe jiadeje. Hu God-are Harihëro jië'ëro God-are aganoho avoho muebe'amajeje. No'o God-are agane javue. God-hu maro ramuoröhe jöho bogo vuonugo'i biririvoromo ni-morohë'i uehorovobe va'ë'ohuro ëhuro no ëhi javue.

God-are ariböviehu nuho'iröhe jöhoje.

⁷ Èhuni God-are Aru'aho hesi jöho avoho eja-hore. Hesi surire jöho ëhi uvë'eje:
Ave jaruvore majaroho God-hu majëhijaje jö
hejë'iroho

⁸ nadi hia'oho biriri'övorëjo.
Jemesi hijo miono'ehu hia'i biriri'övoromo God
na'o muorovarëhioho
nadi ëhioho ë'orëjo.
Jabuhu a rumo'e sa'are raromoromo God nasi dë
bijioho gavarëhioho
nadi ëhioho ömorëjo.

⁹ Jemesi hijo miono'ohuro nasi mu masijo gabe
rovaroho ëho bogo uehorovo'i
nasi dë bijioho gebe rovaroho vadune 40 barëjade
höjo.

10 Ëhuni God naro ë aribövi jabesi örire
bijönimoromo uvode höjo:

Majae ëhi jabumë dë vövöbajo'ere sisë'i ue-
horovo'i

nasi mu hesi öroho bogo avoho baerumë'e höjo.

11 Ëhi uvoromo naro dë vörönegamu jöe darugo'o
jövoromo uvode höjo:

Jabumë bogo na'oho ro raromoromo nuho-
ruomo'ajëjo. Bogo mae bogajo.

12 Agonomë ëhi jajivë'e jiaje ëhuni gavë'i
raromore. Jemë a ioro'iorohuro God bogo
ma uehorovarue uehoro sisëho baeromo ëhuro
darugo'e aho God vuonugo'aruje.

13 A'i göëro göho jögore mamirovore. God-
are surire mami'e adahare jöho uövuë'eje: Ave
jaruvore majaroho nadi hia'oho biriri'övorëjo.
Ëuövuade jaruvore majaho bogo barëjë'e jiaje
evaro majae ëhi göëro göho jögore mamirovore
ëhuro jemë a ioro'iorohuro sisëho garomo
bogo simane huotorovoromo ëhioho hia'oho
biriri'övo'irarije.

14 Jögoru mamirovo'irarije hesi bëhoho noehu
aevo'i biririvoromo mae uehorovarëhi jië'e ue-
hore gemuoho ma'eno titimobe va'ojuvo majae
barëjamu bogo vuonugë'ohuro ëhuro no Keriso'o
gemu mae javuajeje.

15 God-are surire mami'e adahare jöho
uövuë'eje:

Ave jaruvore majaroho God-hu majëhijaje jö
hejë'iroho

nadi hia'oho biriri'övorëjo.

Jemesi hijo miono'ehu hia'i biriri'övoromo God
na'o muorovarëhioho

nadi ëhioho ë'orëjo.

¹⁶ Röhu rahumëro jöho heromo ri'öromo God'oho muorovareje. Moses-hu Egypt sa'are jioromo söjëvo rovade aribövioho ae aho'o jaburo huotorovoromo God'o muorovareje.

¹⁷ O God-ro rahumesi öriroho bijönimobe rovadoho vadune 40-ho barëjadeje. God-ro mu sisë vaeruomaje aribövioho bijönimadeje. Ëaribövioho sisë vaeruomë'ëro ëhu'ëro a rumo'e sa'are vuovo momorö'öbe va'oruomadeje.

¹⁸ O God-ro jöe darugo'o uvadeje: Jabumë bogo na'oho ro raromoromo nuhoruomajäjo. Bogo mae bogajo. Ëho rahumesi jöho jövadeje. Jö bogo ejahare aribövi jabesi jöho jövadeje.

¹⁹ Ëhu'ëro jji'ëro no garomo uvö: Nosi hijo miono'ehu bogo ma uehorovarohuro ëhuro jabesi sa'are va'o nuho'iröhoho bogo eni jëvade höjo.

4

¹ God-ro mae uövuë'eje noro va'oromo hu'o raromoromo nuhoröhego. Ëhuhu uövuade jöho bogo barëjë'e jiaje ëhuni juhuonivoromo gavë'i raromere. Ijonö God-ro a ioro'ioro jemesi muoho garomo uvojöëni: Rueromo na'o nuho'irarijoho jemë bogo eni jëvajë uvojöëni uëve.

² No God-are jö maho hejë'e javue. Urimë'i a rumo'e sa'are jijihoruomade ë aribövioho jabu'o ë jö maho hejareje. Hejareje röhu bogo marëjëvadeje ë hesi bëhoho hejare jöho bogo ma uehorovë'ëro.

³ A'i no Iesu mae uehorovarue ariböviohuro iae va'o God'o gemu mae raromoromo nuharueje.

Ēnuho'iröhe jö God-are surire adahare jöho ähi uövuë'eje:

Naro dë vörönegamu jöe darugo'o jövoromo uvode höjo:

Jabumë bogo na'oho ro raromoromo nuhuruomo'ajëjo. Bogo mae bogajo.

Ēhi jajivë'eje röhu ë hesi urimo God-ro sa'ae bövie bise'e bamamu evare hesi muoho barëj'ëro jaruvoho bogoje.

⁴ God-hu mu barëjade jö God-are surire jajivaroho majae 6-ho barë'i 7 jiade jö jajivarire ë gavarueje. Ējöho ähi uvë'eje: Majae aho'obëhe 6-ho barë'i röhu 7 jiamu gavë'i God-ro hesi muoho aho'obëhe vuonugo'i nuhade höjo.

⁵ Röhu ave God-are surire jöhu'o jajivoromo uövuë'eje: Jabumë bogo na'oho ro raromoromo nuhuruomo'ajëjo. Bogo mae bogajo.

⁶ Ēhu'ëro jië'ëro urimë'i God-are jö ma heruomade ariböviohuro hesi jöho bogo ejahoromo ehuro bogo va'o hu'o gemuoroho raromoromo nuhareje. O ae göehu göehu va'oromo God'o raromoromo nuho'iröhe jöho bogo barë'i iae ähi gemuohoje.

⁷ Ēhuni God-ro majae gö bamoromo uvë'eje: Ave jaruvore majahajo. Ēhesi bëhoho urimë'i hia'i biriri'övore aribövioho vuovëvadoho va'ojuvo majae ëgo'o barëjamu evare God-ro uavamu David-ro noehu adahare jöho jajivoromo uvadeje:

Ave jaruvore majaroho God-hu majëhijaje jö hejë'iroho

nadi hia'oho biriri'övorëjo.

8 Urimë'i Joshua-hu Israel aribövi jabesi sa'are söjêvo va'adevare ë ariböviohuro God'o raromoromo nuhoruomö'ibejo majae göre nuho'iröhe jöho God bogo bamö'ibejo. Röhu jabumë bogo God'o ho raromoromo nuhareje.

9 Bogo nuhë'ëro ëhu'ëro God-are ariböviehu nuho'iröhe jöho bogo barë'i iae ëhije. Urimë'i majae aho'obëhe 6-ho barë'i majae 7 jiamu God-hu aevoromo nuhade ëhi jië'e nuho majaho God-ro noni bamahuë'eje.

10 Ëhesi bëhoho God-hu hesi mu vuonugö'i nuhadëhi ae rahu va'o God'o raromoromo nuhë'öho i'u'e muoho ëhi vuonugö'i nuhoruomajeje.

11 Ëhuni no va'o God'o raromoromo nuho'iröhoho avoho vae ga'ejo ëhuro ë hijo mionö'ehu God-are jö bijönimoromo sa'are rireromarëhioho no bogo ëhioho ë'iröhëro.

12 God-are jöho darugo ma-ma'eje. Darugo ma-ma'ëro jië'ëro ë jöho kaejö va'ëneje. Hesi kaejö anio ruë jio vië jië'öhuro nosi dëre nure aho'obëhe ro bijioho gövuajeje. Röhu nosi kaejöhö anio rumö'e jio'amo'i God-are kaejöhö anio ma-ma'eje. Ëhuni no diehi diehi nosi uhure uehorovoromo nimiruoho God-ro nosi dë vövöbajö'ere göromo hesi jöho ma-darugö'o ahorirëro majahuijajeje.

13 Iae ae bövie bise'e God-hu bamavuadoho hesi nuniroho bogo gurihiroho javuö'i a'i aho'obëhe God-hu gövuajöho ma-va'orahoro gemu javue. God nosi börömego noro hesi nunire riravoromo ua'ejo: Iae no ëhi ëhi vaejë'e javuajëjo. Ëahuro no gö barëjë'eje.

Iesu hu priest börömo ma jiaje jöhoje.

14 Röhu no priest börömo maho javue. Huro ö'idöre God-hu jiaje mare ë ajiomadeje. Hesi ihoho Iesuoje. Hu God-are Hariheje. Ëhuni noro mae uehorovoromo huruoho majëhjarue jöho ma'eno titimo'ejo.

15 Nosi priest börömohuro gövuaje nosi uehoroho darugoho u'uhoromo mu sisë vae hesi javuego göromo hu bogo ma-nunëremuoho gövuajeje. Nosi dëre mu sisëhu rabehu rabehu bijahuo'i hijajëhi sisëhuro nosi priest börömo hesi örire ëhi gemuoho vaejadeje. Ëhi gemuoho vaejamu bogo ejadeje.

16 Ëhuni ë'ego no biririvoromo God-hu börömo namiromo hijajire ë va'oromo nosi jöho majahinövo'iro God-hu hesi nimoro ajamuijajohuni. Noehu va'oromo jö majahijë'o ho huë vavaene baejavuo'iramu evare huro noni vavaenimoromo huë baejavuoromo ajamui'iramu mae javuo'ë'e.

5

1 Ave sa'are raromarue priest masijo jabesi muoho aviëhije. Ae gemu ae aho'obëhe jabesirire jiego God-ro baeromo muro bamajeje huro God-are muoho ë aribövi jabesi jöëni vaeröhego. Muro bamë'ëro priest börömohuro ë aribövi jabesi jöëni muoho vaeromo mi suvoro'u'o suvoro ioro'ioro'u'o God-are örire bojamijajeje huro jabesi sisëho uehorovoromo vuonugëhoröhego.

2 Ave sa'are hijaje priest börömohuro garöhe ae gö simane garaejanovamu o öre sisë'i sisë'i

jijihamu gëvë'oho uvo'ë'e: Priest-oho na'o u'uhevë'ëro ëhi jië'e mu sisëhuro baejevaje hõromõ jõgorõho ma-u'emu avõho majëhi'ë'e.

³ Ave sa'are priest bõrõmõho u'uhë'ëro mu sisë vaejajeje. Mu sisë vaejajëro jië'ëro bogo a ioro'ioro jabesi sisënioho gemu a'i hesi sisëhuni mi suvuorõho God bojami'ë'e huro hesi sisëhu'o uehorovoromo vuonugahorõhego. Bogo bojamijë'õho sisëje.

⁴ O aevoromo priest bõrõmo mu vae'ië'iroho aho bogo sivuõho uehorovoromo dõroho bamorovoromo priest bõrõmo muõho bae'i a'i God-hu uavë'õhuro ëhuro priest muõho baejajeje. Priest bõrõmo aevo'i jiade hesi ihõho Aaron God-hu uavamu priest mu baejadëhi God-hu uavë'õhuro priest muõho ëhi baejajeje.

⁵ God-hu uavego priest mu baejaruëhi ëhi Kerisoro hu'o bogo hesi sivuõho uehorovoromo dõroho bamorovoromo priest bõrõmo muõho bae'i a'i God-ro priest muro bamoromo Keriso uavadeje:

Ja nasi Harihõho javajëjo.

Jaruvõho naro ja baejavë'e jevajëjo.

⁶ O God-hu priest mu bojamade jõ gõho jajivoromo ëhi uvë'eje:

Melchizedek priest jiadëhi

ja ëhi priest jianuõho ëhi jiemu javõ'ajëjo.

⁷ Iae Iesuro ave sa'are hijadevare evare uvadeje: God ajemego bogo guomevo'irõhõho iae eni hõ uvoromo darugo'o uvë'i nivë'i ëninamiromo ua gavadeje ajamijõro. Iesuro

God-hu nimajoho ma-u'emu ejahonövë'ëro ëhuni God-ro hesi jöho ejahadeje.

⁸ Hu God-are Harihe jjadeje röhu vi'ehe baeromo ehuro God-are jö ejaho'iröhe öroho gavadeje.

⁹ God ejaho'iröhe öroho ganugoromo eni romorome jiamu evare öroho jiovahuadeje ehuro ae rahu hesi jö ejahë'o'ho ma-ioro'ioremu maro raromoröhego.

¹⁰ O God-ro jöe majahiromo Iesu uavadeje: Ja priest börömoho javajëjo. Melchizedek priest jiadëhi ja ëhi javanovajëjo.

*Noehu Iesu uehorovaruoho bogo
vuonugo'iröhe jöhoje.*

¹¹ Melchizedek-are jöho aho'obëhe majëhi'irodoho jeve. Röhu jemesi simanoho i'u'eje. Na diehi diehi jöho röjëhi'ejo.

¹² Jemë Christian vaejarijoho majae ëgobövie baejë'e jëve. Ehuni jemëro ae gö jö röjëhi'irarijoho eni jëvo'ibejo iae mae jio'ibejo. Röhu jöho bogo avoho baejë'ëro jemë nimarujeje God-are jö aevo'i röjëhijamu hejarijoho aëro röhu maho röjëhijöro. Jemë amure asisö'oho va'ëne jëvanove. Biriri'e i ma bogo ue'aharuje aribövie jëve.

¹³ Amemu ue'ahë'e Christian aribövioho masisö'lo va'ënëro jëvë'ëro mu ma hesi jöho bogo ömo gavë'ejö.

¹⁴ A'i biriri'e i maho hesi a ma'ëremu ue'ahoruomajeje. Ehü jïë'e Christian ariböviohuro mami'e muoho ömo garomo simanoho avoho

uehorovobe rovë'ëro ëhu'ëro gavarueje di muoho mae jiego di muoho sisë jiego.

6

¹ Asisö'ehu uehorovaruëhi ëhi uehorovaruje jëvaje ëhuni ë'ego no Keriso-are jö samaho samaho urimo hejaroho bogo ëhemuoho uehorovo'i a'i hesi jöho i'e gö'o gö'o döre uehorovobe va'i ëhuro a duvahu uehorovaruëhi ëhi uehorovo'iröhe. Christian mu vae'iröhe jö aevoromo ae röjëhijaruoho bogo ëhemuoho jemesi öriroho röjëhi'i ari'ejo. Mu sisë vaeromo sisërëjaruoho vuonugo'iröhe jö hesi bëhoho God ma uehorovarue jö hesi bëhoho

² sisë jovehu u'ovarue jö hesi bëhoho övo simano taemarue jö hesi bëhoho ijönö vuovoromo ri'ö'iröhe jö hesi bëhoho mana mae o sisë God-aro ioro'ioremu bae'iröhe jö hesi bëhoho ëhi jië'e jö urimo röjëhijaruoho bogo ë jöe gemuohemu röjëhi'i ari'ejo.

³ A'i God-hu nimë'oho jö i'e gö gö uehorovobe va'ejo a duvaho va'ëne javuojöro.

⁴ O aehu urimo God-are nuni aji'e jö baeromo ö'idö hesi suvoro garomo God-are Aru'aho no'o gemu mae baeromo

⁵ hesi jö ma heromo vuëvëvamu ijönö bae'iröhe darugoho gö avevejö'e baebe va'ojuvo

⁶ röhu huotorovoromo Keriso uehorovaruoho vuonugo barëjë'oho ëhi jië'oho no diehi'oromo ajëmi'ejo jabumë röhu maho sisëho vuonugo'i huotorovoromo mae uehorovo'iröhego. Öre bogoje. Rabëni ëhi jië'e aribövioho jabesi dë

vövöbajo'ere sisë'i uehorovaruohuro ehuro God-are Harihoho korosire röhu maho ano taemanovoromajeje. Ano taemanovoromo ehuro Iesuare ihoho a nuniro ijumoruomajeje.

⁷ God-are huë mae baebe va'ojuvo Keriso vuonugo'iröhe jöho naro uhunö'e i'o mu'ero bamo'ejo. Ënëro mure rue'li hiromo sa'ae sanuovego ehuro iruno'e bövie bise'e ri'amego mu arijo'o ho jaburo mabëhe gagovo bahiruomajeje. Ëhi jië'e i'o mu'o ho God-ro avoho muebel'iramu ma-mabëhe jio'ë'e.

⁸ O ënehu mure rue'li hijamu röhu mure mabibë'e resu resu sisëhuremu ri'amë'o ho uvarueje: Ëi'o mu'o ho sisë höjo. Ëhi'ego God-ro i'o mu'o ho ma-sisë'i avoho hesije vëniro bue'öromo ijumo barë nahonahovo'iröhëro.

⁹ Nasi aganomë iae na ëhi jië'e jögoroho uhu'e majëhijë'e jeve. Röhu na uehoro mae baeromo uve: Jemë bogo ehioho jëvavjëjo. Iae aji maho baej'ëro God'o maro raromo hesi jëvavjëjo.

¹⁰ God bogo sisë'ioho uehorovajeje. Jemëhu mu ma vaejarijoho hu bogo rumonimo'ë'e. O jemëhu hesi örire uehorovoromo hesi aribövi ajëmijarijoho röhu jaruvohu'o ëhi gemuoho ajëmijarujoho ëhu'o bogo rumonimo'ë'e.

¹¹ Röhu na negajoho jemë ae gemu gemu jemëhu God-are muemu nimo avoharujëhi ëhi gemuoho nimo avohobe va'ojuvo hujeji maja viture jemë nimoromo muebejarujoho bae'a'aruje.

¹² O jemëhu God-are jö uehorovarujoho u'uhëvo'iröhoho na bijönege. Al'i na nege a ioro'iohehu biririvoromo God mae

uehorovoromo ehuro huhu ajemi'i uevadoho biroharuëhi jemë'o jabesi muoho gavë'i ëhi ë'irarijego.

God-hu ajamui'iröhëro mae uövuade jö noehu biririvoromo mae uehorovo'iröhe jöhoje.

¹³ Iae God-ro Abraham ajami'i uavadeje. Röhu bogo ma-ua'i a'i darugo'e jöho majahiro mo ëhi mae uavadeje. Ae gö God iosiramiromo börömo jië'oho bogojiadeje God-hu ë a hesi iho uvoromo darugo'e jö majahi'iröhoho. Ehu'ëro jië'ëro hesi ihoho uvoromo ehuro hesi darugo'e jöho majahiro mo

¹⁴ Abraham uavadeje: Iae naro jasi örire mae vaejavoromo a uje aho'obëhe bojamibe va'ejöjo.

¹⁵ Bojamibe va'ejöjamu Abraham-ro heromo biririvoromo uvo'i hinövadeje: Na iae bae'ejö uvoromo God-hu uavade ujoho iae birohadeje.

¹⁶ Sa'are aribövi noehu darugo'e jö majëhijë'oho ae gö hesi ihehu nosi iho iosiramuiromo hu börömo jiaje ë a hesi ihoho uvoromo darugo'e jöho majëhiromo ehuro mae uëvarueje. Ehi ë'ë'oho aho bogo ijönöho ë jöho aho uö'ë'ö.

¹⁷ O God-ro nimadeje hu ajamui'i uövuade aribövioho röjahuijego noro garomo uvoröhego: Iae mae-ëjo. God-ro ajamui'i nimadoho bogo vuonugo'ajë uvoröhego. God-ro ëhi nimoromo hesi iho uvadohuro ehuro darugo'e jöho Abraham majahijadeje.

¹⁸ Ehu'ëro jië'ëro God-hu ajami'i uvade jöhu'o hesi iho uvoromo darugo'o uvade jöhu'o ë jöe

niö'ioho bogo sisërë'ë'e. Ëjöho God bogo sareramui'ë'e. Ëhuni nomëro mamì'e huruomoromo God-are burure va'ë'ëro uvo'ejo: God jö maemu jövajëromomo ehuro uehoro mae bae avohoromo biririvoromo uvo'ejo: Iae huro uövuadëhi iae ëhi maro ramuo'ajëjo.

¹⁹ Hisiehu munë beromo e'u derire ba'amego vanagi ma'enegro namijajëhi huhu maro ramuo'iröhe jöho noro uehorovoromo nosi dë vövöbajo'oho biririvoromo riravarueje. Iae uvarueje: God'lo nosi ririre urahadoho Iesuro niögunö'e babu'öromomo God-hu jiajire nosi sisëho avohahuo'i va'o hijë'ëro jië'ëro iae ëhuni huro ijönö maro bamavuo'ajë uvoromo ehuro bibivoromo riravarueje.

²⁰ Iae God-hu jiajire Iesuro nosi jöëni urimo va'ë'eje. Hu priest böröme vaejë'eje. Priest böröme vaejë'ëro Melchizedek priest jiadëhi hu ëhi priest jiajoho ëhi jiemu jio'ë'e.

7

Priest hesi ihe Melchizedek-are jöhoje.

¹ Melchizedek hu Salem amore böröme naminövade ae jiadeje. O göho hu God dö mare hijaje hesi priest böröme jiadeje. Abraham-ro a masijohu'lo muorovoromo muo'amonugoromo rovamu gagorovo Melchizedek-ro hu birohoro hui mae hi'iröhe jöho bojamadeje.

² Bojamamu Abraham-ro ujuoho rovade inömo inömoho aho'obëhe mevoromo hue aho'o 10 bahiromo 9-ho hesi bahi'i gemu God-are suvuoro maho Melchizedek mamadeje. Röhu

Melchizedek-are iho huotovë'oho ëho aji'e mu ma muebejaje a börömohoje. O hesi amo ihe Salem hu ë amo hesi a börömoho jiadeje. Salem amo hesi a börömo jiade ë jö hesi bëhi huotovë'oho huë baerovarue mu muebejaje a börömohoje. Melchizedek ëhi jië'e a böröme jiadeje.

³ Hesi vëmu vavu'e hijo miono'e jabesi jöho bogoje. Hu rahade guomade maja hesi jöho bogoje. Ehu'ëro God-are Harihe hu ioro'ioyemu priest jiemu jiajëhi Melchizedek ëhi jianove.

⁴ Jemë'o uehorovore. Melchizedek hu a böröme jiadeje. Ehesi bëhoho Abraham hu Israel rajo nosi ni'l'ivade bëhoho jiadeje röhu muorovoromo ujuoho rovade inömoho ëho mevoromo hue 10 bahiromo God-are suvuro maho gemu Melchizedek-are örire mamadeje. Abraham-ro God-are suvuro maho Melchizedek mamijë'ëro ëhu'ëro no garomo uvarueje: Melchizedek-ro Abraham iosiramiro mo börömo mae jiade höjo.

⁵ O Abraham-are uje gemu Levi jiadeje. Levi-are ado sirino'e jiobe rovaje priest-oho jaburo God-are jögoroho ejahoromo Israel rajo aribövi ioro'ioy jabesi örire God-are suvuro maho ujuoharueje. Priest-ehu suvuro ujuoho'ia'amu gavë'iroho Israel rajo ioro'iorohuro jabesi inömo inöme mevoromo hue aho'o 10 bahi'amego priest-ohuro God-are suvuro maho gemu baeruomajeje. Levi rajo priest-ohuro jabesi sa'a rajo jabesi örire suvuroho ëhi baeruomajeje. Jabesi sa'a rajoho jabu'o Abraham-are agane gemuoho jioruome röhu jabesi örire ëhi jië'e

suvuoroho baeruomajeje.

⁶ A'i Melchizedek bogo Levi rajo aganoho jiadeje röhu huro Abraham-are örire God-are suvuoro maho baejadeje. Baeromo huë mae hi'iröhe jöho Abraham majahijadeje. Abraham hu God-ro ajami'iröhe jöho majahijamu hejë'ëro ëhu'ëro iae hu huë mabëhe birohë'e jiadeje röhu Melchizedek-ro Abraham-are örire huë mae hi'iröhe jöho majahijadeje.

⁷ Röhu huë mae raromo'iröhe jö heruomaje aribövioho ma-jianovo'i a'i ëhi jië'e huë mae jö majëhjarue aribövioho masije jio'amajeje. Ëhi jiajoho iae no ae aho'obëhe gavarueje. Ëhuni Melchizedek-ro Abraham-hu huë mae hi'iröhe jöho majahijë'ëro ëhu'ëro no gavö Melchizedek-ro Abraham iosiramiro mo börömoho jië'e jio'ego.

⁸ O Levi rajo priest ömo'öme God-are suvuoro ujuoharuoho jabumë vuovarueje. A'i Melchizedek suvuoro ujuohadoho ë a hesi jöho God-are surire uvë'eje: Hu iae hijajëjo.

⁹ Iae Levi-are ujo ömo'ömhuro God-are suvuoro maho ujuoharueje röhu Abraham-hu Melchizedek God-are suvuoro bojamadevare Levi hu'o ë suvuoroho Melchizedek bojamanovadeje.

¹⁰ Ëhesi bëhoho Levi hu bogo rahë'e hesi hije Abraham-are visöro jië'iro evare majare Melchizedek-ro Abraham birohadeje.

¹¹ Röhu Levi rajo ae Aaron'o hesi ujohu'o Jew rajo jabesi jögoroho muebenövareje. Muebejaroho jabesi muohuro ioro'iore gemu ae ajëmi'ibejo priest göho bogo rue'ibejo. Röhu

jemë'o uehorovore. Jabesi muoho bogo eni jië'ëro ëhuni God-ro priest i'e gö baejadeje. Bogo Aaron-are ujo va'ëne priest-oho bae'i a'i Melchizedek jiade ëhi jië'e priest-oho baejadeje.

¹² Levi rajo priest-oho vuonugo'amo'i priest i'e gö baejë'ëro ëhu'ëro jabuhu muebejare jögoroho ëhu'o vuonugo'i jögoru i'e rovë'eje.

¹³ Röhu nosi Bada Melchizedek va'ëne priest jioröhe hesi jö God-are surire jajivaroho ë aho bogo Levi rajo aehu jio'i hesi ae gö jiadeje hesi aganoho priest muoho bogo vaeromo God-are suvuro bahijarue maratuoho bogo muebenövë'ëro.

¹⁴ No ae aho'o gavarueje nosi Badare agano ihoho Judah rajemu jio'amego. Röhu Moses-hu priest mu jö jövadiroho hu bogo uvadeje: Judah rajëro ë muoho vae'a'aruëjo.

Iesu Melchizedek va'ëne priest jiaje jöhoje.

¹⁵ Röhu priest gö Iesu Melchizedek priest jiadëhi jië'e priest-oho iae rovë'eje. Ëhu'ëro iae no ma-samae gavarueje priest mamiohu'o jögoru mamiohu'o barë'i i'e rovë'e jiego.

¹⁶ Ëi'o rovade priest-oho hu bogo vavuehu mu vaejade siono harihehu baeröhe ë hesi jögoroho ejë'ëro bogo ëhuro priest muoho bae'i a'i ioro'ioremu hi'iröhe darugoho baejë'ëro ëhu'ëro priest muoho baejadeje.

¹⁷ Ëioro'ioremu hi'iröhe jöho God-are surire jajivoromo uövü'eje: Melchizedek priest jiadëhi ja ëhi priest jianuoho ëhi jiemu javo'ajëjo.

18 Urimore jionövade jögoroho u'uhë'ëro jië'ëro ëhu'ëro bogo maho ajamuinövadeje. Ëhuni God-ro ë jögoru hesi öroho tugohadeje.

19 Ëhesi bëhoho ë jögoroho bogo ae gemu vadu'oho ajamui'ego ioro'ioremu maroho javuonövadeje. A'i God-ro öri i'e jiovahuë'eje. Ëöri i'ohuro öri mamioho iosiramiro mo mamabëhe jië'eje. Ëöri i'o hesi bëhoho no nimorohë'i uvarueje: Iae God-ro ajamui'iramu maro raromo'ejarejo. Ëuehoro mabëhoho javuë'ëro God-are bëhire va'arueje.

20 Röhu God-ro Iesu priest muroho bogo ëma bamo'i a'i darugo'e jöho uvoromo bamadeje. Urimoho Levi rajo priest mu bojëmi'ië'iroho aho bogo ëhi jië'e darugo'e jöho uvoromo muoho bojëminövareje.

21 A'i Iesuro priest muoho bae'ia'amu God-ro darugo'e jöho uvoromo bamadeje. Ëjöho God-are surire jajivoromo uvë'eje:

God Badaro ave jöho darugo'o uvë'ëro bogo vuonugo hesi höjo:

Ja priest jianuoho ëhi jiemu javo'ajëjo.

22 Iesuro priest mamioho iosirëmijë'ëro ëhu'ëro God-hu muebejavuoröhe jögoru Iesuhu ma'enaje ë jögorohuro jögoru mamioho iosiramiro mo mamabëheje.

23 Röhu göho Levi rajo priest-oho aho'obëhe jio'amobe rovë'eje rabëni hesi bëhoho vuovëvobe rue'ego muoho bogo ma-biririvoromo vaemu vaenövë'ëro.

24 A'i Iesuro ma-ioro'ioremu biririvoromo hi-jajëro jië'ëro ëhu'ëro a göho hesi sionoho bogo

bae'i huro priest muoho ma-vaemu vaebe va'o hesije.

²⁵ Iesu priest muoho ma-vaemu vaebe va'o hesirëro jië'ëro ëhu'ëro ae rahu hesi ihore God-are bëhire va'ë'oho Iesuhu baejavuoromo ma-ioro'ioremu mare ramuo'iröhoho hu eni jie rabëni hu bogo guomo'i majae ëhi biririvoromo hiromono nosi jöëni God-are örire jöe majahijajëro jië'ëro.

²⁶ Ëhi jië'e priest börömhuro iae mae ajamua-jeje. Hu sisë rumo'ëro jië'ëro hu a ma-maeje. Aribövi sisëho öre gö jio'amo'i hu öre göje. Huro ajiomoromo sa'ae ö'idöe iosirami'amoromo ajiö dö maro hijë'eje.

²⁷ Levi rajo priest masijehu ë'onövarëhioho Iesuhu ëhi ë'iröhoho bogoje. Majae ëhi Levi rajo priest-oho jaburo God-are örire mi suvuoroho i'imami'i arinövareje. Urimoho jabesi sisëhuni i'imaminugoromo ijoroho God-are aribövi ioro'ioro jabesi sisëhuni mi suvuoroho i'imami'i arinövareje. Iesu bogo ëhioho ë'i a'i hesi arijo'arije God-are örire bojamirovoromo guomorovë'ëro ëhu'ëro hesi suvuoroho majae gemu ma-ioro'ioremu bojamirovadeje.

²⁸ Moses-hu bojëmade jögoru hesi uhuroho ma-u'uhë'e aemu priest masije bamobe rovë'eje. A'i ë jögoru hesi ijönö God-ro darugo'e jöho uvoromo hesi Harihoho bamadeje priest böröme jioröhego. ËHarihoho bogo u'uhë'oho jio'i mue aho'o ro-moromoro ma-ioro'iore gemu bae barëj'eje.

Iesu hu nosi priest bōrōmo jiaje jōhoje.

¹ Na jajivobe rovode jō hesi bēhoho aviēhije. Naehu jajivode ēhi jiē'e priest bōrōmoho javue. Hu ō'idōre ajiomoromo God eni jiē'e aehu bōrōme namijaje a hesi ōvo manō hijē'eje.

² God-hu jiajire osa hesi muoho vaejajeje. Ēhesi bēhoho huro God-are javu hesi priest muoho vaejajeje. Ējavuoho bogo maja aru'aho va'ēne amoho jianovo'i a'i God-are javu maeje. Bogo ma-aehu avoho'i Badaro avohē'eje. Ēosa hesi muoho nosi priest bōrōmohuro vaejajeje.

³ Amo priest masije aho'o muro bahijarue hesi bēhoho jaburo mi suvuore ōvo suvuore gō gō God bojami'irōhego. Ēhuni priest muro bahijarueje. Jabesi muoho ēhi jiē'ēro nosi priest bōrōmohu'o ōvo suvuore jio'ē'e God bojami'irōhego.

⁴ Rōhu Iesu sa'are hi'ibejo bogo priest-oho jio'ibejo ē hesi bēhoho hesi Levi rajo priest-ēremu ē muoho vaeromo Jew rajo jōgorure jajivare suvuoroho God-are ōrire bojamijaruēro jiē'ēro.

⁵ O Levi rajo priest mu vaejaruoho ēho ō'idōre jiaje muoho va'ēneje. Ēmuoho ma-arua'ahonō'e jio'i bogo mahoje. Aviēhi jianove. Moses-ro God-are niōgu javuoho avoho'ia'amu evare God-ro uavadeje: Gavē'iajo. Ja'o na'o dahorure ariromo naehu rōjahijamu hejanēhi bōvie bise'e ēhi vaenējo. Amo priest ōmo'ōmohuro ēhi ō'idōre jiaje mu va'ēne vaejarueje.

⁶ A'i Iesuhu baejade priest muohuro Levi rajo priest jabesi muoho iosiramiro mo bōrōmohoje. Ēhesi bēhoho Iesuro priest bōrōmēro jiē'ēro God'o

no ae aho'obēhe nosi ririre namiromo öroho avo-hahuoromo God-hu muebejavuoröhe jögoroho avohahuajeje. Ęjögoru Iesuhu avohahuajohuro Levi rajo priest jabesi jögoroho iosiramiro mo mahoje. Ęhesi bēhoho Levi rajehu muebejarue jögoru God-hu Jew rajo aevo'i bojēmadevare evare ma-bisemu ajēmi'i uvadeje. A'i Iesuhu avohahuaje jögoru God-hu aevo'i bojamuadevare evare böröme ajamui'i uvadeje. Ęhu'ero Iesuare jögorohuro Levi rajo jabesi jögoroho iosiramijē'eje.

⁷ Levi rajo priest-ehu muebejare jögoru urimo bojamuijadoho eni jio'ibejo God jögoru göho bogo bamo'i uehorovo'ibejo ajamui'iröhēni. Bēhoho bogojio'ibejo.

⁸ Röhu God-hu jövade jö hesi aribövi bogo eni jioruomaje jöho hesi surire jajivoromo ēhi uvē'eje:

Badaro ēhi uvajējo: Iae majae ijonöho nasi aribövi muebejēvo'irode jögoru i'oho avohoromo Israel rajohu'o Judah rajohu'o mēmi'ejöjo.

⁹ Mami'e jabesi hijo miono'o muebejēvo'irode jögoru mēmodēhioho bogo ēhi jiē'e jögoroho mēmi'ejöjo.

Jabesi hijo miono'e Egypt sa'are jēvamu naehu söjēgo rovodevare evare majare jögoroho mēmode höjo.

Mēmamu jaburo jögoroho bogo biririvoromo ejeho'i vuonugare höjo.

Ęhuni naro jabumē bogo gēvanovode höjo. Badaro ēhi uvajējo.

10 Röhu Badaro uvajëjo: Ëmajaho barë'iramu aviëhi jië'e jögoroho Israel rajoho mëmi'ejöjo.

Naehu nimaje ëhi ëhi ë'onövo'iröhe jöho jabesi simanore ba'amëho'iramu uehorovoruomo'ajëjo.

Jabesi dë vövöbajo'ere jajivëho'iramu ejehoruomo'ajëjo.

Ëhi'o'iramu jabumë muebejëvo'irode börömohe jevo'ajëjo.

Jabumë nasi aribövi mae jioruomo'ajëjo.

11 Amo rajëro göëro göho bogo röjahirovoromo aganëro göëro göho bogo majahirovoromo uarovo'aruëjo: Bada avoho gahëjo.

A ininore ëhi va'o a masijore aho'obëhe na ge'a'aruëjo.

12 Jabuhu sisë vaejaruoho naro jabumëni vavaenimoromo jabesi sisëho ma-ioro'ioeremu uehorovoromo vuonugëho'ejöjo.

13 Ëjögorohe i'e hö uvade hesi bëhoho urimore bojamuade jögorohe iae mamiraejë'eje. Röhu jöe rabe mamiraeromo sisërëbe va'ajoho ëho maburëro barë'ië'e.

9

Jew rajo a mami priest masijehu God-are örire mi kö suvoro bojaminövare jöhoje.

1 Ëurimore jögoru hesi uhuroho God rajahi'iröhe öri hesi jöho jiadeje. O sa'are vaejare javuoho jiadeje God ë rajahi'iröhoho.

² Ējavuoho niögëro vaejareje. Ēosa gagoho ririro iromo tariojamu osae niö'i jëvadeje. Viënörire osaroho iro bahijarue gijoho maratuoho maratu döre bahijare God-are ioho ëhi jio'amonövadeje. Ēosa hesi ihoho God-are osa maho jiadeje.

³ Niögehu iromo tugohë'e ë hesi ruënörire osa gö hesi ihoho God-hu jiaje osaho jiadeje.

⁴ Ēosa'eroho ridi'e oso buejarue maratue gold-ehu avoharoho o God-are jögoru bamare mauaho ë inömo niö'ioho ë dirö'ore jëvadeje. Ēmauaho hesi sinoroho gold-ëro ruë numë have rova'oromo taemo titimë'e jiadeje. Ēmaua gagoroho gold'e ramaho God-hu i'imëmade ie gö hesi ihoho manna aegë'oho ë jiadeje. Göho Aaron-are ijaho sirinohijadoho maua gagore jiaadeje. Göho munë ha'osire God-are jögoru jajivo'amadoho maua gagore jiadeje. Ēinömoho niö'i gemu maua gagore jio'amadeje.

⁵ O maua dönöho vivoju'e majo va'ëne aehu avoharohuro rirarovareje. Ēinöme niö'i jabesi bëhoho uvoromo ë'areje: God-are ajoho aviaie höjo. Röhu nume maua döho God-hu sisë mu'unövadoho jiadeje. Ēdirö'oho majo va'ëne jabesi vivojohuro aegahareje. Ēinömo jabesi jöho naro ma-bisemu jövë'ëro vituoho vuonuge.

⁶ Ēinömoho aho'obëhe ë avoho bahijë'ego evare priest ariböviohuro viënörire osare aevoromo majae ëhi va'oromo God-are muoho vae'i arinövareje.

⁷ A'i ruënörire osaroho hesi ma-priest

börömohuremu vadune gemu hesi uhure majae gemu rumo va'onövadeje. Rumo va'ië'iroho bogo övemuoho va'i a'i mi köho baeromo ë osare rumo va'oromo God-are örيره bojaminövadeje. Hesi sisë hesi jöhuni bojamiromo a ioro'ioro jabesi sisëhu'o röromo ëhuni bojaminövadeje.

⁸ Hesi ma-priest börömohuremu ruënörيره God-hu jiaje osare va'ë'ëro jië'ëro ëhu'ëro God-are Aru'ahohuro ma-sama'e röjahuijajeje noro garomo uvoröhego: Viënönire osa hesi mu jiadevaroho evaroho God-hu jiajire va'oröhe ojoho bogo jiovahu'e jiade höjo u'emu jio-vahuoröhëro.

⁹ God-hu ë niögu javuohu'o ë javu hesi muohu'o bamade hesi bëhoho jaruvo noehu God ue-horovarue mu maho ëho maja aru'ahonö'e röjahui'iro ëhuni bamadeje. Ësaroho mi suvuore o suvuore gö gö God i'imaminövareje. God-ni ëhi vaenövareje röhu bogo ëhuro herovonövareje jabesi dë vövöbajo'ere sisëho barëjëho'ego.

¹⁰ Ëhi jië'e suorovo hesi bëhoho ma-i ijaruoho jovo ijaruoho jovo eguaruoho inömo u'o'amaruoho ëhi jië'e jöhuremu jionövadeje. Ma-dajo hesi jöhemu God-ro ma-jahuri bamadeje ëhuro ëhi jiobe va'ojuvo hujeji hesi mu öri mami tugoho'i Keriso-are mu i'o jiovahuo'iröhe majaho rueröhego.

Iesuhu hesi kö God-are örيره suvuro bojamade jöhoje.

¹¹ Jaruvoho Keriso rovë'eje. Hu priest börömohuro jië'ëro avevejö'e hesi mu maho vaejajeje. Urimoho ma-aehu niögu javu börömo

vaejarire priest masijohuro ë rumo va'oromo muoho vaenövareje. Avevejö'oho Keriso bogo ëhi jië'e javuoroho rumo va'ë'ëro muoho vae'i a'i javu ma-mabëhire rumo va'ë'ëro muoho vaejajeje. Ejavu mabëhoho bogo aho vaejè'ëro ëhu'ëro God-hu bövi bise'o bamade noehu ga'amaruoho gö jio'amo'i ë javuoho hesi ahe göje. Ehu'ëro ë javuohuro javu mamioho iosiramiro mo börömo mahoje.

¹² Kerisoro ë javu börömore va'oromo muoho vae'irögoro bogo goat hesi köho o cow harihu hesi köho baeromo ë osaroho va'adeje God-ni bamahoröhëro. A'i hesi kö maho baeromo osare va'oromo evare God jiajire ma-ioro'iore gemu va'oromo no baejavuoromo ma-ioro'ioremu maro ramuadeje.

¹³ Röhu Jew rajehu jabesi sinore sisë baeromo ehuro God bogo avoho rajahi'ië'iroho priest-ëro goat hesi köho o ano'e cow hesi köho baeromo hijiovodëgonövareje. O cow harihu hesi muomöho jovohu'o buarohoromo baeromo hijiovodëgonövareje. Hijiovodëgo'ego jabesi dajore jiaje sisëho barë'ego ehuro God-are örire rajahijë'oho iae mae jëvonövadeje.

¹⁴ Mi köehu rabehu hijiovodëgo'ego dajore jiaje sisë u'o'amonövaroho ma-jianovo'i a'i Kerisore kö rovadoho ëho mu börömo mahoje. E mu hesi bëhoho Kerisoro ioro'ioremu jiaje Aru'aho hesi darugohuro biririvoromo hesi dajoho God-are örire bojamirovoromo guomorovadeje. Hu mu sisëho bogo vaejè'ëro ehuro huro suvuoro mabëhe vaeromo hesi arijo'arije bo-

jamirovadeje. Bojamirovamu köho rovè'ëro èhu'ëro mu sisë vaeromo nosi dë vövöbajo'o iju-morovaruoho u'ovahuo'iramu herovo'ejo sisëho barëjahuo'iramu. Sisëho barëjahuo'iramu èhuro God mae hijaje a hesi muoho noro avoho vaenövo'ejo.

Iesu kö rueromo guomë'ëro èhuro God-hu mue-bejavuo'iröhe jögoru i'o marëjade jöhoje.

¹⁵ Èhuni Kerisoro God'o nosi ririre jioromo God-hu hesi aribövi muebejavuo'iröhe jögoru i'o hesi öroho avohahuajeje. Jögoru i'o hesi öri avohahuaje hesi bëhoho èhuro God-hu hesinö uövuade aribövioho noro ioro'ioyemu jioröhe mu mae gö gö Vavu hesi örire bae'amoröhego huro bojamui'i uövuè'ëro èhuni avohahuajeje. Mu mae baeröhe hesi öroho aviëhije. Keriso guomadeje. Guomamu èhuro noehu jögoru mami hesi uhure raromoromo mu sisë vaebe rovere è hesi jö sisëho iae u'ovahuo barëjë'eje. Sisëho u'ovahuo barëjë'ëro èhu'ëro Vavuehu bojamui'i uövuade mu maho no baejarueje.

¹⁶ Keriso guomë'ëro noehu mu ma baejarue jöho uhunö'e bamo'ejo ga'irarijego. Ave sa'are vavu ömo'ömohuro vuovego rahuhu inömo ujuoho'iröhe jöho surire jajivoruomajeje. A'i jabesi aboji harihu'ehu bövi bise'o ujuoho'ië'iroho ae aho'obëhe garöhe vavuoho vuovo'iramu bövioho bise'oho evare ujuoho'ë'ö. O bogo vuovë'iroho bogo ujuoho'ë'ö.

¹⁷ Vavu bogo vuovo'i raromë'oho jabuhu jajivare jögoroho èhi ma-momorö'öjajeje. A'i

vuovèvego evare vavuehu uvoruomadëhi ëhi ujuoharueje.

18 Ëhesi bëhoho God-hu Jew rajo muebejëvonövo'iröhe urimore jögoroho bogo ëma jio'i urimo mioho bijuëmamu vuovoromo köho rovamu evare God-ro aevoromo Jew rajo aribövioho avoho muebejëvadeje. O mioho bogo muo'amego ëhuro köho bogo rue'ibejo ë jögoroho bogojio'ibejo. Jew rajo aribövioho God-are ahariroho bogo raromo'ibejo.

19 A'i God-hu Jew rajo muebejëvo'iröhe jö hesi muoho Moses-ro avoho'irögoro jögoru jöho ae aho'obëhe majëhi barënuogoromo evare cow harihu jabesi köho baeromo jovohu'o buarohoromo sheep hesi u kavuë'e avoharoho ujuohoromo hyssop ahore huhohoromo ë kö'o jovo'o buaroharire sheep uoho ë io'amadeje rumorovoröhego. Rumorovamu ioromo jögoru jajivo'amade suri suriohu'o ë ariböviohu'o kö'e jovohuro hijiovodëgadeje.

20 Hijiovodëgoromo uëvadeje: Ave hijiovodëgaje köhuro ëhuro God-hu bojëmë'ëro ejaho'irarije jögoroho marëjajëjo.

21 Ëhi majëhiromomo God-are javu börömo niögehu vaejarohu'o God rajahi'amarue inömo inömo hu'o aho'obëhe ë köhuro hijiovodivo'amadeje. Ëhi'adeje.

22 Iae Moses-are jögoru hesi uhuroho aëro köho baeromo bövie bise'e u'o'amo'ego ëhuro ë inömo hesi sisëho barënovadeje. Inöme magemu gemu bogo ëhioho ë'onövareje. O aehu mu sisë vaejë'iroho mi muo'amamu kö rovë'ohuro

ëhuro God-ro mu sisëho uehorovoromo vuonugonövadeje. O mi bogo muo'amamu kö bogo rovä'oho jabesi sisëho bogo barëjëhonövadeje.

Iesu kö rueromo guomë'ëro ëhuro nosi sisë u'ovahuaje jöhoje.

²³ ËGod rajahjarue inömo inömoho ma-maja aru'ahemu sa'are jio'amadoho ëho jabesi sisëho mi köëremu u'o'amonövareje. Öre gö bogojadeje. Röhu ë inömo inömoho ö'idöre inömo ma röjahuijajoho jianovadeje. O ö'idöre inömo maho ma-mi köëremu u'o'iröhoho bogo eni jie. Mi kö God-are örire suvuro bojami'iröhoho bogo eni jio'i a'i suvuro göehu ë mi suvuro iosiramiro mo ma-mabëhe jië'oho ëhuro ö'idöre inömo ma jabesi sisëho u'o'iröhoho eni jie.

²⁴ Ësuvuro mabëhi hesi bëhoho ö'idöre God-hu jiaje öri ari'o va'ëne ma-aehu vaejare osaroho Keriso ëho bogo rumo va'i a'i God-hu jiaje ö'idö mare va'adeje. Ö'idöre va'ë'ëro God-are nunire hiromo nosi muoho avohahuajeje.

²⁵ Röhu Jew rajo priest börömohuro bogo hesi köho bae'i mi köe baeromo God-hu jiaje osare vadune göro göro va'i hinövadeje. Röhu Keriso bogo ëhioho ë'adeje. Ö'idöre va'adevaroho majae gö gö God-are öriroho suvuroho bogo bojamirovoromo guomorovo'i hiröhëro bogo ëhunioho va'adeje.

²⁶ God-are örire suvure bojami'i hi'ibejo sa'a bövi bise'o bamadevare aevoromo vi'ehe baebe rue'ibejo. Röhu bogo ëhioho vi'ehoho baebe rue'i a'i sa'ae bövie bise'e barë'i dunovamu gavë'i

Kerisoro a nunire ioro'iore gemu rovë'leje God-are örire bojamirovoromo guomorovoromo nosi sisëho u'ovahuoröhëro.

²⁷ God-ro bamë'lëro no ae aho'obëhe ma-vae gemu vuovavuo'iröhohoje ijönö hesi nunire riravoröhego.

²⁸ Ae aho'obëhe ma-vae gemu vuovavuajëhi Keriso ëhi ma-vae gemu guomadeje. Hu ma-vae gemu suvuore bojamirovoromo guomorovadeje ae aho'obëhe nosi sisëho u'ovahuoröhëro. Ijönö röhu maho a nuniro vuonorö'ö rue'ë'e bogo mu sisëho avohahuo'i a'i hu rueröhego muebejarue aribövioho no baejavuoromo maro bamavuoröhëro.

10

Jew rajo a mami priest-hu mi bijuëmoromo God suvuro bojami'ego ë suvuro hesi darugoho bogo eni jië'lëro dë vövöbajo'ere sisë bogo u'ovëhonövade jöhoje.

¹ Röhu Jew rajo jögoru urimo jiadoho ëhuro God-are mu maho bövioho bise'oho no bogo avoho ga'i God-are mu maehu ijönö rovadoho ëho no ma-sisë'i sisë'i maja aru'ahonö'e gavarueje. Ëhesi bëhoho aëro Jew rajo jögoroho ejëhoromo mioho vadune göro göro bijuëmoromo God-are örire ëhi jië'e suvuore gemuoho i'imamiemu i'imamibe rovarueje. Röhu ëhi jië'e suvuro ujuohoromo God-are bëhire va'i arijaruoho jabesi uhoho bogo mae bogo marëjëho'ë'e.

² ĒGod rajahjarue aribövi jabesi uhoho marējēho'ibejo ēhuro jabumē herovo'ibejo jabesi dē vövöbajo'o ho mae jēvavego mi bijuēmoromo God-are örire suvuoro i'imami'i arijaruoho vuonugo'ibejo.

³ Röhu bogo ēhioho jio'i a'i vadune göro göro mi bijuēmoromo God i'imamijaruohuro ēhuro jabesi sisēho vadune göro göro ēhi gemuoho uehorovobe va'arueje

⁴ ē hesi bēhoho cow ano'o hesi köhu'o goat köhu'o mu sisē u'oröhoho bogo eni jiē'ero.

⁵ Mi köho bogo eni jiē'ego ēhuni Kerisoro sa'are rue'irögoro God uavadeje:

Mi bijuēmoromo jasi örire i'imamijē'oho ja bogo nimanue höjo.

A'i jero na sino haho'e avohevane höjo.

⁶ Mi bijuēmoromo jani vënire aho'o huo barējē'oho

o mu sisē u'o'iranego mi bijuēmoromo jasi örire suvuoro i'imamijē'oho

ja bogo maho uehorovanue höjo.

⁷ Evare na uavode höjo: God na aviae jevajējo.

Nasi jö jasi jögoru surire jajivarēhi

jaehu nimanue muoho ēhi vae'i abuejajējo.

⁸ Ējō hesi bēhoho no uehorovo'ejo. Urimo Kerisoro God uavade höjo: Mi bijuēmoromo suvuoro i'imami'i o mi jani vënire huo barē'i o mu sisē u'o'iranego mi bijuēmoromo jasi örire suvuoro i'imamijē'oho ēhi jiē'oho ja bogo nimoromo bogo maho uehorovanue höjo. Bogo maho uehorovanue hö uavadoho Moses-hu bojēmijade jögoroho ejahoromo Jew rajoho

jaburo ëhi jië'e mi suvuoroho God-are örire bojaminövareje. Röhu Kerisoro uavadeje: Ëhi jië'e suvuoroho ja bogo nimanue höjo.

⁹ Röhu evare ijönö Kerisoro God uavade höjo: Na aviae jevajëjo. Jaehu nimanue muoho vae'i abuejajëjo. Ëjö hesi bëhoho mi bijuëmoromo God-are örire i'imamili arijare muoho God-ro aho'i Kerisohu bojamirovoromo guomorovo'iröhe muoho bamadeje.

¹⁰ God-ro ëhi jië'e muoho bamamu ëhuni Iesu Kerisoro God-are jöho ejahoromo hesi sino haho'oho ioro'iore gemu suvuore bojamirovoromo guomorovadeje. ËGod-hu nimade muoho vaejëlëro ëhu'ëro nosi sisëho u'ovahuë'eje.

Iesu kö rueromo guomamu ë suvuoro hesi darugoho eni jië'ëro sisë u'ovahuaje jöhoje.

¹¹ Ëhi jie röhu Jew rajo priest-oho aho'o jaburo majae ëhi riravoromo God-are muoho vaejarueje. Mioho bijuëmoromo ëhi jië'e suvuore gemuoho God-are örire i'imamibe va'arueje. Ëhi ë'arueje röhu ëhi ë'i arijaruoho ëhuro mu sisë u'o'iröhoho bogo mae bogo eni jëve.

¹² A'i Kerisoro vae gemu God-are örire suvuore bojamirovoromo guomorovadeje mu sisëho ioro'iore gemu u'ovahuoröhëro. Ëhi'onugoromo ajiomoromo God-are övo manö hijadeje.

¹³ Hijëlëro avevejö'oho hiromo muebeje hu'o muorovarue aribövioho God-ro hesi hörü uhunö bahijego vijuvo taemo'amo'iröhëro.

14 Ëhesi bēhoho huro vae gemu God-are örire su-
vuore bojamirovoromo guomorovē'ëro ëhu'ëro
sisē u'ovahuē'e aribövioho no ioro'ioire gemu ma-
maemu raromemu raromo'ejo.

15 Noehu mae raromemu raromo'iröhe jöho
God-are Aru'ahohu'o ëhi gemuoho majahuiromo
God-are surire uvē'eje:

16 Röhu Badaro uvajëjo: Ëmajaho barē'iramu
aviëhi jiē'e jögoroho Israel aribövioho
mēmi'ejöjo.

Naehu nimaje ëhi ëhi ë'onövo'iröhe jöho jabesi
dē vövöbajo'ere ba'amëho'iramu ejeho-
ruomo'ajëjo.

Jabesi simanore jajivëho'iramu ue-
horovoruomo'ajëjo.

17 Röhu ë jö hesi vituoho God-are Aru'ahohuro
ëhi uvē'eje: Jabuhu nasi jö ahoromo mu sisē
vaejaruoho na ma-ioro'ioiremu uehorovoromo
vuonugëho'ejöjo.

18 Ëhi majahuiromo mu sisëho uehorovoromo
vuonugē'ego ëhu'ego ijonöho no suvuoroho God-
are öriroho bogo bojami'ejo huro mu sisëho
u'ovahuoröhego.

*Noehu God mae uehorovoromo hesi bēhire
va'iröhe jöhoje.*

19 Aganomē Iesure köho rovē'ego no
bogo juhuonivo'i biririvoromo God-hu jiajire
va'arueje.

20 Ëhesi bēhoho Iesuro noni öri i'oho
iogorahuē'eje huro bogo guomo'i hiromo ë
söjavuo va'ego noro God-hu jiajire va'iröhego.
Urimë'ioho God-hu jiaje osare rumo va'arue

ojoho niögëro urahonövareje. Jaruvoho Iesuare sinoho ijumahamu guomamu niögu va'ëne urahade ojoho dadovoromo jiovahuè'ëro noro God-hu jiajire è va'arueje.

²¹ Röhu göho nosi örire priest böröme jie. Huro God-are aganoho no muebejavuajeje.

²² Èhuni è'ego no God-are bëhire va'oromo nosi jöho majahi'iro. Nosi dë vövöbajo'o ho sisërëjavuoromo i'uhaguamu Keriso-are köhuro u'ovahuo'i nosi sino haho'o ho ajivo barëjè'e jovohuro u'ovahuè'e jiaje èhuni è'ego no biririvoromo nosi dë vövöbajo'o uhohu'o mae uehorovoromo God-are bëhire va'oromo jöho majahi'iro.

²³ O no ae huruoho majëhiromomo uvarueje: Ma-jae ijönö God-ro ajamui'ajëjo. È'ego no biririvoromo è jöhuremu mae uehorovobe va'iro rabëni hesi bëhoho hu ajamui'i uövüadëhi iae hu èhi è'iè'e jiaje.

²⁴ O è'ego noro göëro göhuni uehorovoromo dë iahorovoromo èhuro ae huè baejëvoromo mu mae vaenövo'iro.

²⁵ O ae göehu göehu God rajahi'i gemuore gagovoromo vuonugaruèhioho è'ego no bogo èhioho è'i a'i no ajamirovoromo jögore mamirovo'iro èhuro biririvo'iröhe. Èhesi bëhoho jemè'o gavarujeje Badare majaho rue hesi jiego gavarujuhuni èhuni è muoho avoho uehorovo'ejo.

Noehu God-are Harihu bogo dejönö bamoröhe jöhoje.

²⁶ Noehu èhi ajamirovo'iröhe hesi bëhoho noehu Keriso-are jö ma baeromo röhu ijönö nosi

nimoromo biriri'övoromo mu sisëmu vaejë'iroho nosi sisë u'ovahuo'iröhe suvuore gö bogojio'i

²⁷ ma-i'u sisëhemu muebe'iröhohoje. God-ro a sisëho mevëvo'iramu hu'o muorovarue aribövioho vëni vöröro ravëvo'ë'e.

²⁸ Urimoho Moses-hu bojëmade jögoroho ae rahu ahoromo musisinö'e bu'öjamu ae niö'iehu o ae niö'i gemuehu ë a hesi sisë garomo huruoho majëhijë'oho hesi öriroho bogo vavaenimë'e ma-anonövareje.

²⁹ Moses-are jögoroho ahoromo ëhi jië'e i'uoho baenövareje. Ëhuni ae rahu God-are Harihu sivë'oho ë iaho diehi jio'ë'e. O Harihu hesi köhuro ëhuro God-are jögoru i'oho marëjadeje. Ëhuro ë ia hesi sisë u'ovahadoho röhu huhu huotorovoromo uvë'oho: Ëköho bëhi rumo'e hö uvë'oho ë iaho hu diehi jio'ë'e. O God-are Aru'ahehu huë baejavuaje hesi örire sisë vaejë'oho ë iaho diehi jio'ë'e. Moses-are jögoru ahare ariböviehu i'u börömo baeruomadoho ëho ma-jianovo'i a'i ëhi jië'e aho i'uoho bogo bise'o vadu'oho bae'ë'e. Ëhi jië'oho iae maeje.

³⁰ Ave jöho God-are surire jajivoromo uvë'eje: I'u bojëmi'irodoho ëho nasi mue höjo. Naro i'ue mana bojëmi'ejöjo. Ëjö jövade aho iae no gavö. O ave jöho jajivoromo uvë'eje: Badaro hesi aribövioho gëromo mevëvo'ajëjo.

³¹ Iae God darugo'e aëro jië'ëro huhu i'u bojamuamu baejë'oho ë muoho juhuoni ma'eje.

Noehu biririvoromo God mae uehorovo'iröhe jöhoje.

³² Rõhu urimore majare jemëhu diehi ë'arijoho uehorovore. Keriso-are ajehu jemë aevoromo ajivëvadevare evare jemë huë vavaene bõrõme baeromo sivohojuvo biririvarijeje.

³³ Majae göro jemë Keriso nimël'ëro aëro a nuniro jö sisë bu'ö'lego henõvarijeje. Mu sisë vaejëvo'lego ganõvarijeje. Majae göro Christian a ioro'iorohuro ëhi jië'e huë vavaenoho bae'lego garomo jemëro jabu'o havoromo rabe rabe ajëminõvarijeje.

³⁴ Christian ariböviehu savoji gagore raromarue jabesi õrire huë vavaene baenõvarijeje. O aehu jemesi mae sisë vajiohehu ujuohëho va'aroho jemë nimorohë'i uvonõvarijeje: Ëho iae mae hõjo. Nosi inõmo maho õ'idõre hõjo ma-ioro'ioeremu bae'irõhoho. Ëvajiohehu baejare inõmoho iosiramiro mo bõrõmo mae hõjo.

³⁵ Ëhuni Iesuare jö biririvoromo mae uehorovarujoho nadi vuonugore. Biririvë'ohuro ëhuro manaho ma-mabëhe bae'a'aruje.

³⁶ Jemëro u'urume vaenõvore ëhuro God-hu nimaje muoho vaeromo huhu bojëmi'i uëvade suvuoroho bae'irarije.

³⁷ Iae God-are surire jõho jajivoromo uvë'eje: Majae ma-bunemu barë'iramu evare rue'irõhe aho iae rue'a'ajëjo. Bogo õrisanuovo'ajëjo.

³⁸ Rõhu God nasi aribõvi mahuro na mae uehorovevoromo ëhuro biririvoromo raromoruomo'ajëjo.

A'i ae rahu juhuonivo'i nasi õri vuonugë'oho na jabesi jõënioho bogo nimoroho vadë'ejõjo.

³⁹ Röhu nomë bogo juhuonivoromo Keriso-are mu vuonugo'i sisëre va'arue ariböviehu javuoli a'i no God mae uehorovoromo maro va'arue aribövie javue.

11

Noehu God mae uehorovo'iröhe ë hesi bëhi hesi jöhoje.

¹ Mae uehorovarue hesi bëhoho aviëhije. Noehu mae uehorovë'iroho ëhuro no birivoromo uvarueje: No ijono maro raromo'iröhe jöho ëho mae höjo. Rabe rabe jio'amaje noehu nunehu bogo ga'amaruoho iae jio'amajë uvarueje.

² Nosi a mamiehu God mae uehorovarohuro ëhuro jabesi ihoho God-are nunire mae jëvadeje.

³ Noehu God-are jö mae uehorovaruhuro ëhuro garomo uvarueje: God-ro jö'ëro jövamu ëhuro ö'idörohu'o sa'arohu'o jiade höjo. Noehu nunehu bogo ga'amarue inömoho God-ro ujuohoromo ëhuro ga'amarue inömo inömoho avoho'amade höjo.

A mami ae Abel Enoch Noah ëho jabuhu God mae uehorovare jöhoje.

⁴ Iae Abel-ro God mae uehorovë'ëro ëhu'ëro hu God-are örire suvuro maho bojamadeje. Èsuvurohuro Cain-hu God bojamadoho iosir-amijadeje. Mae uehorovamu gagorovo God-ro Abel-are suvuroho mae hö uvoromo baejadeje. Baeromo röjëhijë'eje aëro uvoröhego: Abel hu a

mae hōjo. Amo Abel-hu God mae uehorovado-huro ēhuro jaruvoho hu guomē'eje rōhu hu jōe jōvajeje.

⁵ O Enoch-ro God mae uehorovē'ēro ēhu'ēro bogo guomē'e God-ro ma-ba'o'jioromo hesirire nugadeje. Aēro hu nahareje rōhu bogo birohareje God-ro hu mami'e ba'o'jioromē'ēro. God-hu Enoch bogo ba'o'jioromade majare evare God-ro hu garomo nimorohade hōjo. Ējōho God-are surire ēhi jajivē'eje.

⁶ Rōhu God-ro nomē bogo ēma gōromo nimoroho'i a'i garōhe noehu hesi ōrīre mae uehorovamu gavē'oho nimorohajeje. Ēhesi bēhoho noehu God-are bēhire va'oromo jō majahi'iē'ioroho mae uehorovoromo uvo'ejo: God iae jiajējo. Ae rahu hu biroho'i nahē'oho ajamui'ajējo. Bogo ēhi uehorovē'oho hesi bēhiroho bogo va'ejo.

⁷ O Noah-ro God mae uehorovadeje. Mae uehorovē'ēro hejade God-ro uvamu: Ēhi jiē'e i'uoho sa'are ō'a'ajē uvamu hegorovo huro ē i'uoho bogo gavē'e God ma-ejahadeje. Ejahoromo boat bōrōmoho avohadeje ēhuro hu'o hesi aganohu'o jovoho bogo baejēvego va'o maro raromorōhēro. Mae uehorovoromo boat-oho avohē'ēro ēhu'ēro no garomo uvarueje: Noah-mēremu maho jēvo'i a ioro'ioroho aho'o sisē ē'ē'ēro i'u baeromo vuovēvadoho mae hōjo. A'i Noah-ro God mae uehorovamu God-ro garomo uvadeje: Hu nasi ōrīre mae uehorovajohuro ēhuro hu mae hōjo.

Abraham-hu God mae uehorovade jōhoje.

⁸ O Abraham-ro God mae uehorovadeje. Mae uehorovoromo huro dirö'o göro va'ojöro God-ro uavamu iae ejahadeje. Ejahoromo dinö'e va'iröhoho bogo gavë'e hesi sa'aho nugo'i ëma va'adeje God-hu u'emu bae'iröhego uavade sa'are hörö'iröhëro.

⁹ God mae uehorovadohuni ëhuni God-hu bojami'i uavade sa'are va'o ë hijadeje. Ehijadeje röhu ae gö jabesi sa'aro ma-jahuri hijanovadeje. Hiromomo bogo javu maho vae'i maniögu javuoremu hibe juponövadeje. Ijonö hesi uje Isaac'o Jacob'o God-hu Abraham uavade sa'ae gemuoho bae'iröhoho jëvadeje röhu jabu'o ë sa'aroho niögu javuoremu raromobe jijihonövareje. Jabuhu ë'arëhi Abraham-ro urimoho ëhi ë'onövadeje.

¹⁰ Ehësi bëhoho Abraham-ro uehorovë'e hijadeje ioro'ioyemü jioröhe amo börömo God-hu uehoro baeromo avohadire ë va'o hi'iröhëro.

¹¹ Röhu Abraham-ro God mae uehorovoromo ehuro a ujo jioröhe darugoho baejadeje. Vaboroho Sarah dë tiojë'e jio'i baruoho Abraham mami'e mavojiraeromo harihu bae'iröhe darugo barëjahë'e jiaadeje röhu hu uvadeje: God-hu harihu bojemi'i uevadëhi iae bojemi'ajëjo. Ehë uehorovoromo harihu bae'iröhe darugoho iae baejadeje.

¹² Abraham hu ma-ae gemu jio'i urimo hesi darugo barëromo u'uhanovadeje röhu a ujo jioröhe darugoho röhu maho baejamu hu bëhoho jioromo hesi ado sirino'ohe jiji mujöru'o va'ëne aho'obëhe jio'amobe sö jovo riröre jio'amaje nie'u va'ëne ehë bogo adaho varijënoho jio'amobe

rovadeje.

¹³ Abraham Isaac Jacob jabumë God-are örire mae uehorovë'le raromobe ruejuvo vuovëvadeje. God-hu ajëmi'i uëvadëhioho bogo ëhioho bae'irögoro mae bae'iröhoho ma-ëgo'o riravoromo gavanovoromo uvareje: O ë muoho mabëhe rue'a'ajëromo ëhuni va'orahoro a nuniro uvareje: Noehu ave sa'are raromaruoho ae göehu ave sa'are ma-jahuri raromarue aribövioho javuanovajëjo.

¹⁴ Ëhi jië'le jö uvaroho ëho no garomo uvarueje: Jabuhu uvarëhi ëhi uvarue ariböviohuro ioro'ioemu raromo'iröhe sa'a maho nëgego ëhuni ëhi uvoruomaje höjo.

¹⁵ Röhu jabesi sa'a mare jioromo rovaroho ëho bogo uehorovareje. Ëho uehorovo'ibejo ë vuonorö'ö va'iröhe öroho jiëho'ibejo.

¹⁶ Röhu jabesi sa'a mare jioromo rovaroho bogo uehorovo'i a'i sa'a gö sa'a ma-mabëhe ö'idöre jiajoho ëho nimareje. Ëho nimë'ëro God-ro ëho garomo jabesi jöënioho bogo javojimo'i ma-samae uvajeje: Iae na jabesi A Börömoho God jevajëjo. Iae God-ro amo börömoho avohëh'eje jaburo ë va'o raromo'iröhego.

¹⁷⁻¹⁸ Röhu Abraham-ro God mae uehorovado-huni ëhuni hejade God-ro hesi dëre bijioho gavamu hegorovo God-are jöho ejahoromo Isaac baeromo God-ni ano'irögoro hesi maratuore bamahadeje. Urimë'i God-ro Abraham jö mae majahiromo uavadeje: Na bogo a göho ajami'i ma-Isaac gemu ajami'iramu ëhuro jasi ihoho jiobe va'a'ajëjo. Iae God-ro ëhi mae uavamu

hejadeje röhu Abraham-ro hesi harihu gemu'oho Isaac God-are örيره bojami'irögoro ë'adeje.

¹⁹ Èhesi bëhoho Abraham-ro uehorovoromo uvadeje: A vuovamu ri'öjoro ajëmijë'oho God hu eni höjo. Röhu iae ëhi jianovadeje. Abraham-ro uvadeje: Isaac guomo'ië'ajëjo röhu gavade God-ro ajami'ego bogo guomamu sionëro baejadeje.

Isaac Jacob Joseph ëho jabuhu God mae uehorovare jöhoje.

²⁰ O Isaac-ro God mae uehorovadohuni ëhuni hesi harihe niö'i Jacob'o Esau'o ijonö huë mae ari'iröhe jöho majëhijadeje.

²¹ O Jacob-ro God mae uehorovadohuni ëhuni guomo'irögoro Joseph-are harihe gemu gemu huë mae ari'iröhe jöho majëhijadeje. Majëhiromo guduodohuro bëdumo hiromo God-are örيره rajahijadeje.

²² O Joseph-ro God mae uehorovadeje. Mae uehorovë'ëro ëhu'ëro guomo'irögoro evare ae uëvadeje: Ijonöho Israel rajo ujo ömo'ömohuro ave Egypt sa'are jioromo va'oruomo'ajëjo. Va'irögoro nasi ijo'ahoho ujuoho va'oromo ë va'o raromo'iröhe sa'are guavo'aruëjo.

Moses-hu God mae uehorovade jöhoje.

²³ O Moses-are vëmu vavu'ohuro God mae uehorovareje. Mae uehorovë'ëro ëhuni Moses rahonugoromo gavare hu a harihu ma-mabëhe jiamu gagorovo sa'a a bërömo hesi jögoru sisë aho'iröhoho bogo juhuonivareje. Bogo juhuonivo'i Moses baeromo gurihi bamo nugaroho manaere niö'i gemu barëjadeje.

24 Ëhi ë'l'ëro Moses-ro böviraeromo hu'o God mae uehorovadeje. Mae uehorov'ëro iae Egypt sa'a a börömo hesi abojohuro Moses hesi muohoromo uvadeje: Nasi harihe höjo röhu Moses-ro ae uënövadeje: Nadi uvorëjo: Nörö Egypt sa'are a börömo hesi aboji hesi harihe höjo.

25 Ëhesi bëhoho huro uvadeje: Na mu sisë vaeromo ehuro huë ma ma-jahuri baejë'oho ëho bogo maho jio'i a'i na God-are aribövioho jabu'o gemuore bimuvoromo huë sisë baejë'oho ëho iae maho höjo.

26 Huro uvadeje: Egypt sa'are jio'amaje inömo inöme marohë'e mae naehu ujuohë'oho ëho majianovo'i a'i böröme namiromo ajamui'iröhe a hesi mu naehu vaejamu aehu sivegë'oho iae mae höjo. Ëhesi bëhoho huhu u'emu bae'iröhe suvuorohemu uehorovë'e hijadeje.

27 Röhu Moses-ro God mae uehorovadohuni ehuni Egypt sa'a a börömo hesi vöröho bogo juhuonivo'i huhu hijade sa'aho ma-vuonugo'i va'adeje. Va'oromo God noehu bogo gavarue aho hu gemu uehorovajëro jië'ëro biririvadoho bogo vuonugadeje.

28 Röhu Moses-ro God mae uehorovadohuni ehuni Israel rajo aribövioho aevo'i uëvadeje: God-hu Vörö Tugoho'iröhe Söröho irëjo. O mi köe javu ojoro hijiovodivo'amorëjo ehuro a muo'amo'iröhe anerahuro ëho garomo jemesi harihu murioho bogo bijuëmo'i vuonugo va'iröhe höjo.

Jew rajo ae göehu göehu God mae uehorovare jöhoje.

29 O Israel rajoho jaburo God mae uehorovareje. Mae uehorovoromo gavare Kavü'e Sö Jovoho jovo ihoho Kavü'e tarioromo ruhëhi va'o numëhi va'oromo riroho sinioromo ma-sa'aemu jiamu gagorovo va'oromo ioro'ioro gönö jëvamu iojiomoruomadeje. Iojiomamu gavë'i Egypt sa'a rajoho jaburo siho baejëvo va'oromo iojiomo'ia'amu gavë'i jovohuro ro döe garaejëvamu vuovëvadeje.

30 Röhu Israel rajohuro God mae uehorovoromo ëhuro Jericho amoho bae'irögoro rueromo gavare amoho munë rejo ëgoböviëro iromo rova'ë'e jiamu gagorovo God-are jöho mae uehorovoromo amoho majae gemu vae gemu rova'o rojomonövareje. Èhi'obe va'ojuvo majae aho'obëhe 7 barëjumu rejoho aho'obëhe ahoromo sa'are ruvebijamu amoho baejareje. Amo ë ariböviohuro God mae uehorovamu ëhuro amo rejoho ahoromo ruvebijadeje.

31 O Rahab ae ma-gë'amaje magonahohuro God mae uehorovadeje. Mae uehorovoromo gavade sa'a bae'iröhëni möe rueruomaje Israel rajoho rovamu gëgorovo huë baeromo ajëmadeje. Ajëmijë'ëro ijonöho God-are jö bogo eruomade ariböviohu'o ho i'uoho bogo gemu maho baeromo guomo'i mae hijadeje.

32 Na rabëni jöe gö'oho majëhi'ejo. Gideon-hu ë'ade jöho o Barak-hu Samson-hu Jephthah-hu ë'obe rueruomade jöho o David-hu Samuel-hu o jö God-aro baeromo majëhinövare aribövi ioro'iorehu ë'obe rueruomade jöho na jajivo'ibejo majaho barë'ibejo.

33 Ëariböviohuro God mae uehorovoromo ehuro sa'a ioro'ioroho ruahö'ö'amareje. Mu maho nige-mareje. God-hu bojëmi'i mae uëvadoho baejareje. Vörö'e mi jabesi jö'oho tugohëho'amareje.

34 Vörö'e vënoho duohareje. Kaejö ëgehu muo'amëvo'i höjaroho mae rovereje. U'uhëvadoho daruge baejareje. Muorovoromo biririvareje. Biririvoromo sa'a göëro jabu'o muorovamu gagorovo sihö'öjëvareje.

35 Vëmu ömo'ömohuro God mae uehorovoromo gavare jabesi aganoho vuovoromo ri'öjamu sionëro ujuohareje. Iae ëhi jiadeje.

A'i God mae uehorovarue a ioro'ioroho aëro jabumë vi'ehi böröme bojëmamu hara'uoromo vuovëvadeje. Jabumë God-are jöho vuonugo'ibejo vi'ehoho bogo bae'irögoro va'oromo jabesi nimoro raromo jijihö'ibejo. Röhu ëhi é'oröhoho bijönimareje ehuro ijonö i'ovoromo ma-mabëhe raromö'iröhëro.

36 O God mae uehorovarue a ioro'ioroho aëro sivëgoromo hisuebijëvamu huë vavaene böröme baeruomadeje. Röhu göho a ioro'ioroho aëro tövo'amoromo savoji gagore io'amareje.

37 O God mae uehorovarue a ioro'ioroho aëro munëro vajëmijamu a ioro'ioroho aëro huruvo'amamu a ioro'ioroho kaejö ëgohuro bijio'umamu vuovo'amadeje. God mae uehorovarue a ioro'iorohuro mi sino niögu sisëho io'amoromo iruno'o rumo'e bövi bise'o rumo'e raromonövareje. Aëro anëgo birëgo'ego ëma jijihonövareje.

38 Röhu jabesi sa'a rajo sisë aribövie jio'i jabumë a maemu jëvadohuni ehuni a sisë jabu'o gemuore raromë'oho ëho bogo maehu jiadeje. A rumo'e

sa'are sa'are dahorure dahorure munë gagore sa'a gagore ëma raromobe jijihonövareje.

³⁹ Ëho jaburo ae aho'obëhe God mae uehorovobe rovë'ëro ëhu'ëro iho ma-mabëhoho God-are örire baeruomë'eje. Iae ëhi jie röhu God-hu bojëmi'i uëvadoho bogo baeruomadeje.

⁴⁰ Bogo baeruomade hesi bëhoho God-ro noni uehorovoromo uehoro ma-mabëhe baeromo uvadeje jabumë bogo urimoho maho jëvo'i hujeji ijönö jabu'o no'o gemu mae ma-mae javuoröhego.

12

Noehu Iesu gemu uehorovoromo biririvo'iröhe jöhoje.

¹ Ëhi jië'e ae aho'o siri va'ënehu God mae uehorovoromo mae jiamu gabe rovaroho ëho jabesi jöho gavarueje. Ëhuni jabesi jöho uehorovoromo mu göehu göehu hutitimavuajoho ëho rori'o babu'öromo uehoro sisëhu simanore badirohavuajoho ëho dibo bu'ö'irögoro God-hu bojamuade muohuremu biririvoromo vaenövo'ejo.

² Iesuaro nunoho bamë'i muoho ëhi vaebe vae'ejo ë hesi bëhoho huro God mae uehorovarue öroho aevoromo röjahuiromo va'o ijo tugoho'i mae uehorovo'iröhe öroho röjahuijë'ego. Sa'are hiromo uvadeje: Vi'ehe baenugoromo huë mabëhe biroho'ejö uvoromo javoji vëmunajo baeröhoho bogo uehorovë'e biririvoromo korosire guomadeje. Ëhi ë'ë'ëro jaruvoho God böröme namijaje hesi övo manö hije.

God-hu öri ma röjahui'iröhëro i'u bojamuaje jöhoje.

³ Röhu jemëro Iesu uehorovore. A sisëho jaburo nue huodivoromo hesi muoho aho'ia'amu huro biririvadeje. Ëaho uehorovoromo nadi dë vövöbajo'oho u'uhobe va'oromo muoho vuonugore.

⁴ Jemë mu sisë aho gabe rovarujoho bogo ëhuro köho rueromo vuovëvë'eje.

⁵ God-ro jemë hesi aboji harihu'e jëvajëromo hesi jögoroho majëhijë'eje jemesi dë vövöbajo'ere avoho biririvo'irarijego. Na jemë ë jöho rumonëgë'eje o diehi jëve. Ëjöho God-are surire jajivoromo ëhi uëvë'eje:

Nasi harihohajo. Jaehu avoho hijëro Badahu röjahiromo i'u bojamamu gavë'oho nadi juahovonëjo.

O jögoru darugo'o majahijë'oho nadi u'uhonëjo.

⁶ Badahu ae rahu uehorovavuë'oho ë ariböviohuro avoho raromojöro i'ue bojamuijaje höjo.

Ae rahu hesi harihe javuojöro baejavuë'oho ë aribövioho hisuebijavuaje höjo.

⁷ Huë vavaeni rovamu baejë'iroho uvore: God-ro no röjahuijajëromo biririvore. Ëhesi bëhoho God-ro jemë hesi aboji harihu'e jëvajëromo ëhi'ëvajeje. Röhu di aboji harihu'oho vavuoho jaburo bogo i'uoho bojëmë'ejö. Ae aho'obëhe iae baejarueje.

⁸ No ae aho'obëhe i'u baejaruëhi jemë'o i'u bogo baejë'oho bogo God-are aboji harihu'o maho jëvo'i a'i öbie jëve.

⁹ Ave sa'are vavu ömo'ömohuro i'ue bojamui'ego noro mae uehorovëvonövareje. Ëho ma-jianovo'i a'i aru'aho muebejavuaje Vavue God-hu i'u jö røjahuijajoho ëho avoho ejahoromo maro raromo'ejo.

¹⁰ Ave sa'are vavu ömo'ömohuro jabesi simanehu ëma diehi diehi maho hö uvaroho ëhi majae mabisemu røjahuiibe ruenövareje. Ëho ma-jianovo'i a'i God-hu røjahuijaje hesi bëhoho nosi jöënije hu mae jiajëhi no'o ëhi gemuoho javuoröhego.

¹¹ O God-hu no røjahuiromo i'u bojamuajevare evare no uvarueje: Ëmuoho bogo huë ma'oho jio'i huë sisë baejarue muoho höjo. Röhu God-ro røjahuijego no i'ue baebe va'ojuvo eni jiego evare noro God-are mu maho avoho vaejego dë sasohavuajeje.

Noehu avoho birivoromo darugo'o riravo'iröhe jöhoje.

¹² Ëhuni övo höru'e u'uhëvë'oho avoho biririvore.

¹³ Öroho ahorrirëro iogororomo ëhuro maro jiji-hore höru sisërëjëvadoho bogo rireromoromo hurönivëho'i marëjëvo'iröhe.

¹⁴ Ae aho'o jabu'o ma-gemuoro huë mae raromo'i ë'o gare. Mu mahuremu vaebe jijiholi ëhu'o ë'o gare. Aehu bogo ëhi ë'ë'oho Bada'oho bogo mae bogo raromo'ë'ö.

¹⁵ Avoho mueberovore. Aëro God-hu huë baejëvaje öroho vuonugojöëni uëve. O aëro oso sisë bojëmego ae gö gö jemesi dë vövöbajo'oho ijumëvego ae aho'obëhe sisërojëvojöëni uëve.

16 O aëro önö'e muoho vaejööni uëve. O Esau-hu ë'adëhi aëro ëhi ë'ojööni uëve. Esau-ro God rumonimoromo ave sa'are bövie bise'ohuremu uehorovadeje. Hu harihu murioho jiadeje röhu bogo ëho uehorovoromo muri hesi suvuoroho bae'i a'i majae ma-gemu hesi iohuni hesi suvuoro maho ioro'ioremu vuonugadeje.

17 Iae jemë'o gavaruje. Ijonö hu vuonugade suvuoroho vuonorö'ö bae'irögoro nivë'i nahadoho bogo eni jiadeje.

Noehu huë mae baejarue jöhoje.

18 Israel rajo a mamiehu rovarëhioho jemë bogo ëhioho rovë'e jëve. Ëho jaburo garomo heromo rëharue dahoru ihe Sinai ë rovarëje. Rueromo gavare vëni böröme ravoromo ramoramovoromo sue baduno'e jioromo buru böröme rovamu gavë'i

19-20 hejareje hëgöe huo'ego jöho ma-darugo'o uvavavamu. Uvamu hegoroovo hejare uëvamu: Bogo aho gemu a'i miehu rabehu ave dahoru ro rëhë'oho munëro vajamirego guomo'ira uëvamu ë jöho heromo bogo eni jëvamu hegoroovo dinamiro mo Moses uavareje: God uavego nadi gö'oho uvego no he'irarëjo.

21 Iae ëhi jië'e juhuoni'e muoho garomo Moses-ro uvadeje: Asë'e na butubutuegoromo juhuoninegavajëjo.

22 Jemë bogo ëhi jië'e dahoruroho rueromo ga'i a'i Zion dahorure rovë'e jëve. God darugo'e jië'e a hesi amo börömore ö'idöre jiaje ame Jerusalem ë rovë'e jëve. Anerae aho'obëhe raromoruomajire ë rovë'e jëve.

23 God-are aribövi jabesi iho ö'idöre jajivo'amë'e God-are harihu muri ömo'ömehu gagovoromo nimoro nimoro bamaruire ë rovë'e jëve. God ae aho'obëhe mae o sisë javuego gövuaje a hesi örire rovë'e jëve. Mu mae vaenövare aribövie God-hu avohëvamu ma-mabëhe ruahö'öjëvë'e ëho jabesi aru'aho ömo'ömo jabesi örire rovë'e jëve.

24 Iesuare örire rovë'e jëve. Hu God-hu muebejavuaje jögoru avohahuade ahoje. Sisë u'ovahuoröhego Iesuhu kö hijiovö'öjadire rovë'e jëve. Ëkö hesi jö bëhohuro Abel-are kö hesi bëhoho iosiramiro mo maeje. Abel anamu kö rueromo guomade hesi bëhoho God-hu ae gö i'u mana bojami'iröhoho jio'i a'i Iesu anamu kö rueromo guomade hesi bëhoho God-hu huë baejavuoromo sisë u'ovahuo'iröhohoje. Iae Iesuhu kö hijiovö'öjadire ë rovë'e jëve. Iae mabëhe rovë'e jëve.

Noehu avoho mueberovo'iröhe jöhoje.

25 Ëhuni avoho mueberovore. God-hu jö bojamuijajoho nadi bijönimore. Sa'are hijade aehu God-are jö majëhijadoho Israel ariböviohuro heromo bijönimë'ëro i'uoho bogo huotovahareje. Ëho ma-jianovo'i a'i ö'idöre hijaje aehu majahuijaje jö nomë heromo vuonugë'ooho diehi diehi huruomolejo.

26 Urimë'i God-ro Sinai dahorure jöe jövamu ëhuro sa'aho hijiohijiovadeje. Avevejö'oho huro mae majahuiromomo uövuë'eje: Majae gemu röhu maho na sa'aho hijiovo'ejöjo. Röhu bogo

sa'ahuremu hijiovo'i ö'idöhu'o sa'ahu'o hijiohi-
jiovo'ejöjo.

²⁷ Majae gemu röhu maho hijiovo'ejö
uövuade hesi bëhoho huhu avoho'amade
bövioho bise'oho hijiohijiovoromo ujuoho
va'iramu bogojio'amo'ë'e. Ëhi jio'iramu
bogo hijiohijiovoröhoho ma-ioro'iore gemu
bibivoromo nami'ë'e.

²⁸ God-hu böröme namiromo muebejaje öri
ari'oho bogo hijiohijiovo varijënohoje. Ëho
nosije. Ëhuni God-are örire huë mae ua'ejo. Mae
uaromo huhu nimajëhi noro hesi ihoho bövie hö
uehorovoromo avoho rajahi'ejo

²⁹ ë hesi bëhoho nosi Böröme God sisë vënehu
bue'öjanovaje aho jië'ego.

13

*God-hu nimorohoröhego noehu vae'iröhe mu
hesi jöhoje.*

¹ Röhu Christian ö mueno'e göehu gö huë
baerovaruje muoho ëho avoho ma'enore.

² Ëhi'oromo ga'irarije ae gö jemesi amore i'e
ö'amu gavë'iroho uënövore: Nosi osaro ro raro-
mohëjo. Urimoroho a mamiohuro gavare ae i'e
rovamu uvareje: Ma-a maëremu rovaruëromo
ajëmijareje. Röhu bogo aehu rueruomamu ajëmi'i
aneraëro rueruomamu ajëmijareje. Ëhuni ae i'e
ö'ego ajëmi'irarije muoho nadi rumonimore.

³ Iesuare jöëni savoji gagore raromarue
ariböviohuni uehorovore. Uvore: Jabuhu
savoji gagore raromaruoho no'o gemu mae
raromaruëromo ëhi huë vavaene baere. O vi'ehi

baeruomaje ariböviohuni uehorovore. Uvore: Jabuhu sino vi'ehi baejaruoho no'o gemu mae baejaruëromo jabesi jöëni huë vavaene baere.

⁴ Röhu masurovarue muoho ae aho'obëhe mae uehorovore. Baruohu'o vaborohu'o jemesi arijo'ëremu garorovore. Önö'e jijihë'ooho o goho'amë'ooho ëhuro God-ro i'ue mana bojëmi'ë'e.

⁵ O nadi moniohemu bae'i uehorovo'i a'ij uvore: Noehu bövi bise'o baejaruoho iae eni höjo. Rabëni God-ro no uövuë'eje: Na bogo mae bogo ja vuororamiromo ramo va'ejöjo.

⁶ Ëhuni no biririvoromo uvo'ejo:

Badaro na ajemijaje höjo.

Ajemijajego na bogo juhuonivo'ejöjo.

Aho diehi'oromo na ijumevo'aruëjo.

⁷ Jemesi ekaresia a masijoho uehorovore God-are jö aevo'i majëhijaroho. Jabuhu avoho raromo jijihöjuvo ma-mae vuovëvade jöho uehorovoromo jabuhu God mae uehorovarëhi jemë'o ëhi gemuoho God mae uehorovore.

⁸ Ëhesi bëhoho Iesu Keriso hu urimo jiadoho jaruvohu'o ijonöhu'o ëhi ma-gemuohemu jiemu jio'ë'e.

⁹ Ëhuni aehu sarerile jöe gö gö barueromo röjëhijë'iroho nadi ëho uehorovoromo öri mare va'arujoho vuonugo'i ione aho bu'öromo öri göroho va'ore. Noehu uvë'ooho: God-ro hesi nimoromo ajamu'i'ramu nosi aru'ahoho biririvahuo'ajë uvë'ooho ëho mahoje. A'i noehu uvë'ooho: I i'iröhe jögoru rihromë'ohuro ëhuro nosi aru'ahoho biririvahuo'ajë uvë'ooho ëho bogo

maehuje. I ijarue jögoru ejarue aribövioho bogo ehuro marëjävajeje.

¹⁰ Nosi sisë mu'uvahuoröhego suvuoro maho God-are örire bojamijë'eje. Sisë mu'uröhe suvuoro ho Jew rajo priest niögu javu hesi mu vaejaruoho bogo i'ë'ö.

¹¹ Jew rajo priest börömohuro mi köho baeromo God-hu jiaje osare ë rumo va'oromo hesi örire suvuore bojaminövadeje sisëho mu'u'amoröhego. A'i mi maho bogo amoroho nugo'i a'i amore jioromo ujuoho va'o rori'o vëniro huonövadeje.

¹² Rori'o huonövadëhi aëro ëhi Iesu bogo amoroho nugo'i a'i amo börömore jiamu rori'o bava'areje. Bava'amu vi'ehe baeromo guomadeje ehuro hesi kö maho rovego hesi aribövi nosi sisëho u'ovahuoröhego.

¹³ Iesu amore jiamu rori'o bava'amu guomë'ego ehuni no'o amo rajehu sisë'i uehorovarue bogo jabesi gemuoro ho uehorovo'i a'i Iesure jöëni i'ue baeromo hu'o gemuore riravo'ejo.

¹⁴ Rabëni ave sa'aroho noehu ioro'ioremu raromo'iröhe amoho bogojavue. A'i ijonö jioröhe amohemu ehuremu uehorovö. Ehuni amo rajehu sisë'i uehorovarue jabesi gemuoro ho no bogo uehorovo'i Iesu'o riravo'ejo.

¹⁵ Hu'o riravoromo mi suvuoro ho bogo a'i Iesure ihore God rajahiro mo ehuro suvuoro ho hu bojaminövo'ejo. Esuvuoro hesi bëhoho noehu hesi iho a huruoho majëhijë'o ho ëho noro jö'o öge i va'ëne ëhi God-are örire suvuore bojamarueje.

¹⁶ O huë baerovoromo ajamirovarujoho nadi

rumonimore. Ëhi jië'e mu vaejë'oho God-ro uvajeje: Jabumë ëhi ë'aruoho ëho mi suvuoro mabëhe bojemaruëjo.

¹⁷ Röhu ekaresia muebejëvarue aribövioho jabuhu jö bojëmijaruoho nadi aho'i ma-ejëhore. Rabëni jabumë jemesi dë vövöbajo'oho muebejëharueje ijonö God-are örيره majahiromo uaruomoröhëni: Iae no jasi aribövioho ëhi ëhi muebejahare höjo. Jemëhu jabesi jö ejëhë'ohuro ëhuro jabumë bogo huë vavaenoho baeromo ëma muebejëvo'i jabesi dëho sasohëvo'iramu muebejëvo'ë'ö. O bogo ejëhë'oho jabu huë vavaene bae'ë'ö röhu ëma muebejëvo'ë'ö. Ëhuro jemë bogo marëjëvo'ë'e.

¹⁸ Röhu jemëro nosi jöëni parie vaenövore. Ëhesi bëhoho noehu uehorovaruoho majae ëhi mu maemu vae'i naguoromo ëhuro no dë saso-havue. Ëhuni parie vaenövore.

¹⁹ Na nego avohe jemëro ëhi ë'ojöro ëhuro God-ro remö'öjego na jemesi örيره ma-burëro ö'iro.

²⁰ Röhu na nege huë mae bojamuaje aho God-ro jemë ajëmego mae jëvojöro. Ëhesi bëhoho sheep muebejavuaje a böröme Bada Iesu God-ro ajamijamu guomoromo ri'öjadeje. God-hu Iesu ajamade hesi bëhoho Iesu köe rueromo guomamu ëhuro God-hu no ioro'ioremu muebejavuo'iröhe jögoroho jiadeje. Ëhuni Iesu ajamamu ri'öjadeje.

²¹ Amo na nege God-ro jemë inömo maho mu maho aho'o ajëmego huhu nimaje muoho vae avoho'irarijego o huro nosi dë vövöbajo'oho mae avohahuego noro mu mae vaejego huro göromo dë mae jioröhego. Huro Iesu Keriso-are jöëni ëhi

ajamuijōro nege. Keriso-are ihoho ma-dō maro
jiemu jio'ë'e. Iae mae.

Ijo tugoho'i jōhoje.

²² Aganomë naro ave jō harihoho jajivoromo
bamëhe jemëro adahoromo dë vövöbajo'oho
biririvo'irarijego. Jemëro nadi u'uvo'i ma-here.
Jōho bogo ëgehuje.

²³ Röhu ave jōho uë'ië'e jemëro he'irarijego.
Nosi öho Timothy savoji gagore hijadoho jiovo
nugö'öjë'eje. Hu burëro rovamu gavë'oho ëhuro
na hu'o gemu mae ö'oromo gë'ejo. O hu bogo
burëro rovë'iroho naro sivue ö'ejo.

²⁴ Jemesi ekaresia a masijohu'o God-are aribövi
ioro'iorohu'o jejëmijode hōre. Italy sa'a rajo
ekaresiaho jaburo jemesi örire jejëmijö.

²⁵ God-ro ae aho'obëhe jemë huë baeromo
ajëminövo'ë'e. Ahia mino'e.

God-are Jögoru I'oho
The New Testament in the Omie language of Papua
New Guinea
Nupela Testamen long tokples Omie long Niugini

copyright © 1991 Wycliffe Bible Translators, Inc.

Language: Ömie (Omie)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 18 Apr 2025 from source files dated 31 Aug 2023

a68769b4-6180-5825-a17e-676d8f6a7efa